

SALAN SA USA KA TAWONG NAGAHUNAHUNA



Salamat, Igsoong Mann. Nakita ko ikaw nga nagdala og usa ka igsoong lalaki. Panalanginan ka sa Ginoo. “Ang tanang butang mahimo, magtoo lamang.” Mag-ampo kita.

Oh Dios, sa tinuod mao kana ang ginapangandoy sa among kasingkasing karong gabhiona, ang magtoo lamang. Samtang nagakatigum kami dinhi sa tabernakulo karong gabhiona, ang adlaw nga nagasalop na didto sa kasadpan, nagaampo kami, minahal nga Dios, nga Imong ipaamgo kanamo kung daw sa unsa na ka haduol kini nga ang adlaw usab nagasalop diha sa panahon; talitapus na kini. Nagakagabii na. Ug mahinumduman namo usa ka higayon sa dihang nagakagabii na, duha ka pumapanaw ang midapit Kanimo sa pagsulod ug sa pagpabilin uban kanila. Ug dayon Imong gipaila ang Imong Kaugalingon ngadto kanila pinaagi sa pagsaysay sa Imong Pulong ug sa pagpakita kanila nga mao kadto ang kinahanglan nga pagaantuson sa Cristo, tanan niadtong mga butanga usà.

² Busa nagaampo kami, Dios, nga sa dihang nagakatapos na ang adlaw, nga magsulod Ka sa among mga balay ug magpuyo uban kanamo, ug isaysay kanamo ang Pulong, Ginoo, nga matalamdon gayud nga among ginatagad ingon nga usa ka bahandi gikan Kanimo, ingon nga usa ka gasa diha sa among kasingkasing. Hinaut nga dili namo Kini pagalapason; hinaut nga kanunay namong tahuron Kini sa tibuok namong mga kasingkasing.

³ Ginapasalamatan namo Ikaw tungod sa Imong gibuhat sa kadtong mga atua sa hospital kaganinang buntag, ug sa Imong gibuhat nga kaayohan sa gamay nga batang lalaki ni Igsoong Capps nga naghigda didto, halos mamatay na, ug karon ania na siya uban diha sa mga mananambong karong gabhiona. Daw sa unsa Ka gayud namong ginapasalamatan, Amahan, tungod sa tanan niining mga butang!

⁴ Itugot, Ginoo, nga mahibalo kami kung daw sa unsa nga kinahanglan namo nga pagadayegon Ka. Amo lang... Lagpas kini sa among mga panabut nga mahibaloan kung unsaon paghatag og mga pagdalayeg Kanimo. Apan, Ginoo, dawata ang among mga kasingkasing ingon nga mga timaan sa pagpasalamat, nga Ikaw gihigugma namo. Ug sa diha nga among—nga gusto namong buhaton kung unsa’y husto, ipakita kanamo kung unsa ang buhaton. Nagapangamuyo kami diha sa Ngalan ni Jesus. Amen.

Mahimo na kamong manglingkod.

⁵ Maayong gabii sa niining halangdon og puno nga iglesia karong gabhiona ug dinha sa mga telepono sa tibuok kayutaan. Ingon nila nga nakakonekta na usab sila karong gabhiona.

Nagalaum ako nga nagapaminaw karon ang akong asawa. Wala ako nakapanawag kaniya, mao nga tawgan ko siya human niining panerbisyo.

⁶ Ug aduna kami og usa ka sinulat dinhi nga kaganinang buntag si Igsoong Jackson ang iyang igso-. . . o ang amahan atua sa ingon niadto nga kahimtang, nga usa ka kausbawan ang nahitabo, tingali makapauli na siya ugma.

⁷ Ang batang lalaki ni Igsoong Capps, nga naitawag niya kanako sa miaging gabii, wala ko kabalo kung anaa ba dinha sa mga mananambong si Igsoong Capps o wala, apan, ug masakiton kaayo kaniadto ang gamay niyang batang lalaki.

Ug nahitabo pud nga si Joseph ug ako atua didto sa—sa bansayanan sa pagpamusil, nga ginaandam niadto ang baynteddos ko nga riple. Giestoryahan ko na kamo bahin niini sa miaging semana. Ug mamahimo gayud siyang usa ka maayong mamusil. Ug busa gusto niyang masigurado gayud ug sultihan si Gary ug si Larry kung unsa ang iyang gibuhat. Ug ingon niya kanako, pagbalik na . . . Ingon ko, “Angay lang nga mohunong usà ka ug—ug sultihan mo si Igsoong Gene Norman mahitungod niini.”

Ingon niya, “Hunong sà ug sultihan ko una si Billy,” ang igsoon niya.

Human nga gipakita niya kaniya kung unsa siya ka maayo mamusil, ingon niya, “Karon magpahilayo-layo ka na kanako.” Kita n’yo?

⁸ Ug pag-abot namo mismo didto, aba, mibagting ang telepono, ug midagan didto si Billy aron pangutan-on. . . Ingon ko, “Mahimong usa kini karon ka tawag sa masakiton.” Ug bagohay lang kami miabot, ug si Igsoong Capps kadto. Ug ang maong gamay nga bata adunay peritonitis, ug adunay usa ka gamay na lang kaayo nga kahigayonan nga mabuhi. Ug giayo siya sa Ginoo. Ug sa miaging gabii may nag-ingon nga nag-antus na usab siya sa kung unsa nga matang sa kasakit, ang sulti kanako ni Mrs. Woods. Ug nagadalidali kami niadto nga molakaw na, ug ako lang. . . ingon ko, “Mrs. Woods, halawum na ang kagabhion karon, alas diyos na, duda ko kung pasudlon pa ba ako nila didto sa hospital.” Ingon ko, “Mopauli sà ko sa balay ug manirado na lang sa pultahan.” Ug misaka ako ug nag-ampo. Ug ingon nila nga ang maong gamay’ng bata anaa na dinha uban sa mga mananambong karong gabhiona. Busa nagapasalamat gayud kita tungod niana. Ug mapasalamaton kita.

⁹ Karon padayon kitang nagalaum; wala pa kita’y nadungog. Kung nagapaminaw karon si Igsoon nga lalaking Mercier

ug Igsoon nga babayeng Mercier, wala pa kaming may nadungog mahitungod sa inyong amahan. Nagalaum kaming may madungog sa dili magdugay, kung kumusta na kaha siya. Apan halos nakasigurado ako nga mamahimong okey lang siya, busa ginasalig nato kana ngadto sa Dios nga Makagagahum sa tanan, nga pagaampingan sa Dios kanang pinalangga, tigulang na og balaang lalaki, usa ka tigulang na nga beteranong ministro sa Ebanghelyo.

¹⁰ Karon, oh, daghan kaayong mga butang ang gikinahanglan buhaton, ug sa ingon ka hamubo lang nga panahon aron mabuhat kini, busa ipangtampo na lang nato ang tanan natong mga pagpanglimbasog dinha sa kung unsa ang mahimo natong buhaton para sa Ginoo.

¹¹ Mianhi ako nga medyo sayo-sayo pa. Ug ako—wala pa ako nagbati og ingon ka maayo kaayo. Gikapoy ako, sa tinuod nakapoy gayud, ug mihigda ako kaganinang hapon. Wala pa. . . Wala pa gani ako nakapaniudto. Busa ako—misulod ako, mihigda lang sa tibuok hapon. Dili maayo ang akong gibati, busa mihigda lang ako. Ug dayon miampo ako, ug maayo na ang akong gibati. Ug mibangon, nagsul-ob og sinina, ug mianhi na sa simbahan.

¹² Busa kita—nagasalig kita karon kang Ginoong Jesus nga panalanginan Niya ang atong tanang mga pagpaningkamot karong gabhiona, sa diha nga sa tibuok nasud nagapaninguha kita nga hiusahon kini nga bahin sa Lawas ni Cristo, nga gihatagan ako og katungod aron nga mapakaon ang Iyang mga karnero. Ug buhaton ko lamang ang pinakamaayo sa akong nahibaloan, sa paghatag sa hustong Pagkaon nga nahibaloan ko nga para sa mga karnero.

Ug matinguhaon akong nagapaabot alang sa maong takna kon diin nga kitang tanan magkatigum diha sa usa ra ka lugar ug makawali mahitungod nianang Pito Ka Mga Hampak, ug Pito Ka Mga Panaksan, ug mga Trumpeta, ug uban pa. Magakahitabo ang mga niini diha sa usa ra ka hut-ong. Mao kana ang hinungdan nga magkinahanglan kita og mga usa ka semana, napulo ka adlaw o sobra pa, aron nga mahisgotan kini diha sa usa ra ka tiningub nga tigum, kon mahimo nato. Siguro mahimong igo na kini kaayo.

¹³ Karon, daghan kaninyo ang mobiyahe pa og halayo. Mitan-aw ako dinhi, ug nahimatikdan ko, bag-o lang, ang mga kaigsoonan gikan sa Tucson. Si Mrs. Sothmann, nakita ko si Igsoong Fred nga miabot nga okey ra. Nakita ko siyang mitambong kaganinang buntag. Ug siguro si Igsoong Don Ruddell kana nga nagalingkod dinha sa iyang luyo, karong gabhiona. Nalipay ko nga makitang ania si Igsoong Don. Ug si Junior, ania ba si Junior, o atua ba siya sa iyang simbahan?

Siguro nakakonekta sila diha sa mga telepono didto sa simbahan nila karong gabhiona.

Busa, sa inyong tanan nga mga kaigsoonan, nalipay gayud kami nga ania kamo dinhi uban kanamo karong gabhiona, ug nagasalig diha sa Ginoo nga kita sa umalabot nga adlaw, pagmahuman na ang adlaw sa kinabuhi ug ang gamay nga kahayag sa atong mortal nga kinabuhi magsugod na og pagkapalong ug mawala na, wala kita'y kahadlok sa bisan unsa nga dautan, kay sa tibuok nga—nga . . .

¹⁴ Bag-o lang ako nakadawat og balita para kaninyo, nga sa—didto sa . . . sa Arizona, didto sa Prescott. Gipapauli na si Igsoong Coggins gikan sa hospital. Busa nagapasalamat gayud kita tungod niana. Maayo. Maayo kaayo kana. Busa mapasalamaton kita kaayo tungod niana. Igsoon nga babayeng Mercier, okey na ang imong papa karon. Basta nga gibati ko, human nga nag-ampo kami, nga mamahimo siyang okey ra. Busa mahimong nagapaminaw sila karon; nagalaum ako nga nagapaminaw sila; ug siguro nagapaminaw sila. Busa mapasalamaton kita kaayo tungod niana, nga ang atong igsoon maoy—okey na karon, ug mamahimong okey na gayud. Busa ginapasalamatan nato ang Ginoo tungod sa tanan niining mga butang.

¹⁵ Adunay usa ka hangyo kagabii; usa ka bililhon nga igsoong lalaki dinhi, siguro wala siya karon uban kanato. Usa ka igsoon nga gikan pa didto sa Kentucky, ang mitawag kanako mahitungod sa iyang anak nga babaye. Hiligugmaon nga pamilya, ug ang—ang maong babaye pagaoperahan, usa ka batan-on pa nga inahan nga may kanser sa likod. Busa kita—nagaampo kita nga luwason sa Dios kining batan-ong babaye. Nagatoo ako nga buhaton gayud Niya, kung ato lang. . .

Ang kongregasyon, kitang tanan nga nagkahiusa, apil mo ug mag-ampo alang niining mga tawo, kitang tanan. Ingon niana ang kinahanglan natong buhaton, ingon nga usa ra ka lawas. Ingon nga . . .

¹⁶ Ug sa diha nga ang mga adlaw nagakahaduol na ug nagakahaduol, ug nagakahiktin pa ang dalan, kita—gusto natong magkahaduol pa sa usa'g usa. Sus, kinahanglan nga mamahimo gayud kitang usa ra, usa ra ka lawas. Kinahanglan nga mamuhat kita nga magkauban, nga ginakalimtan ang sala sa usa'g usa ug ang atong mga panagkalahi, ug basta magdinuyogay nga magkahaduol ug magkahaduol ug magkahaduol pa, sa dihang makita nato nga nagakahaduol na ang Adlaw. Nga nagakatigum-tigum, ang tanan nga nagkahiusa ug usa ra ang kasingkasing. Ug kung ang usa ka igsoong lalaki, igsoong babaye motipas sa dalanon, sa unsa mang paagi, dili magbuhat og unsa man kondili mag-ampo para nianang tawhana, ug sa gugma, magpinalandungay ang usa'g usa sa kanunay. Ayaw—ayaw gayud tugoti nga ang usa kaninyo mapahilayo. Magpabilin

gayud nga nagkahiusa. Ug, kon mahimo ninyo, dungagi pa kini, kanunay, sa tanang panahon.

¹⁷ Igsoong Neville, nadawat ko ang imong hangyo dinhi mahitungod kang Igsoong Wright, si Igsoong George Wright nga nagalingkod dinhi. Nalipay kami Igsoon nga lalaking Wright ug Igsoon nga babayeng Wright, ania . . . Si gamay'ng Edith, ako . . . Usa ka adlaw pagmakaanhi kami, gusto namong magkaaduna og usa ka gamay nga panerbisyo dinhi alang sa paghinumtum.

Wala ako nakabalik para kang Edith ug sa niadtong mipanaw siya. Apan, Igsoong Wright, nahinumduman mo ba ang damgo nga aduna siya kaniadto mga pipila na ka tuig ang milabay. Ug giingnan ko ikaw niadtong tungora, ingon ko, “Kini, dili na kaayo karon magdugay kanato si luoy'ng Edith,” tungod kay nagsulti na ang Ginoo nga mobiya na si Edith, pinaagi niadtong damgo nga nagkaaduna siya. Ug ang nakuha ko nga interpretasyon niini, mao, nga pagatagbuon na niya ang Dios. Mga duha ka tuig human niadto, mipanaw na siya sa pagtagbo sa Dios. Karon ginahulat na lang ang iyang papa ug mama nga tabokon ang maong utlanan nga linya, tali sa pagkamortal ug imortalidad.

¹⁸ Panalanginan ka sa Dios. Gusto kong paninguhaon nga makigkita kanimo pagkahuman niini, kung mahimo ko lang. Busa ang Dios magauban kanimo ug kang Shelby, ug sa tanan. Nagdahum ako nga nakita ko si Shelby kaganinang buntag; dili lang ko sigurado.

Dili ka makakita og maayo gikan dinhi; nga sama niini ka ubos ang kisame, ug kini nagapareplektar sa—sa kahayag nga sama niana. Makita mo ang mga dapit dinha, apan dili mo maayo makita ang mga tawo.

¹⁹ Karon diretso na mismo sa Mensahe. Kini ang usa ka Mensahe nga gusto kong basahon gikan sa Numeros 19:9 ug sa Mga Taga-Efeso 5:26. Ug kaninyong mga tawo nga nagalista og mga teksto, ug uban pa, aba, mahimo ninyong isulat kini.

²⁰ Ug karon hinumdumi, kung kini man gina-teyp . . . wala ko kahibalo. Wala ko'y makita ni usa. Oo, nakita ko na, makita ko si Igsoong Terry dinha sa—sa lawak nga gina-rekordan. Ug kung gina-teyp kini; ngadto sa kang kinsa man nga mga ministro sa asa man nga lugar, sa unsa mang panahon, dili kini direktang ginatumong nga pagbale-wala sa inyong pagtulon-an, dili gani kini patunong sa inyong mga karnero. Kining Mensahe, ug ang tanang mga Mensahe nga akong gikahisgotan, para lang sa akong kongregasyon. Dili kini para sa inyong kongregasyon gawas lang kung gusto nilang dawaton Kini. Apan para Kini sa niining mga tawo dinhi.

²¹ Ginapalit sa mga tawo kini nga mga teyp. Ang mga tawo sa tibuok kalibutan nagapalit niini ug ginapaandar kini. Sa makadaghang higayon nagapadala sila'g sulat. Ug kanunay

ko silang ginaingnan, kung miyembro sila sa usa ka iglesia, “Magpakigkita ka sa imong pastor.”

²² Karon, pastor, gusto ko nga mahibaloan ninyo kana, nga, kini para lamang sa akong kongregasyon nga ginahisgotan kining mga butanga. Ug aduna ako’y katungod aron buhaton kana, tungod kay giordenahan ako sa Balaang Espiritu aron sa pagbantay niining mga karnero. Ug alaut ako kung dili ko sila sultihan kung unsa sa hunahuna ko nga mao ang Kamatuoran, ug ang pamaagi nga sa hunahuna ko nagaabot Kini. Apan dili Kini para sa kalibutan o sa ubang mga kaiglesiahan. Buhaton ninyo kung unsa man ang ginasulti sa Dios kaninyo nga buhaton. Dili ako mahimong manubag para kaninyo, mao usab nga kamo dili mahimong manubag para kanako. Apan manubag gayud ang matag usa kanato sa atubangan sa Dios, tungod sa atong ministerio. Busa, kung kinahanglan akong manubag para sa akong ministerio, kinahanglan nga iwali ko Kini sa paagi nga nakita ko Kini, sa paagi nga gipadayag Kini kanako. Busa angay gayud nga mahibal-an kana karon.

²³ Karon diha sa Numeros 19:9, gusto natong basahon kini nga teksto, o kini nga Kasulatan, diay.

Ug ang tawo nga mahinlo magatigum sa mga abo sa dumalaga nga vaca, ug iga-butang niya sa gawas sa campo sa dapit nga mahinlo, ug kana pagatipigan alang sa katilingban. . . (bantayi karon) sa mga anak sa Israel alang sa tubig sa pagkabinulag: kini mao ang usa ka halad-tungod-sa-sala.

²⁴ Himatikdi, dili nga alang sa tanan, “alang sa katilingban sa mga anak sa Israel; ang mga tubig sa pagkabinulag.”

Karon diha sa Mga Taga-Efeso, sa ika-5 nga kapitulo, ug sugod sa ika-22 nga bersekulo.

Mga asawa, managpasakup kamo sa inyong mga kaugalingong bana, ingon nga sa Ginoo.

Kay ang bana mao ang ulo sa asawa, maingon man nga si Cristo usab mao ang ulo sa iglesia: sanglit siya mao ang manluluwas sa lawas.

Apan maingon nga ang iglesia anaa nahasakup kang Cristo, maingon man usab ang mga asawa magpasakup sa ilang mga bana diha sa tanang butang.

Mga bana, higugmaon ninyo ang inyong mga asawa, maingon man nga si Cristo usab nahigugma sa iglesia, ug gitugyan niya ang iyang kaugalingon alang kaniya;

Karon ania ang gusto kong isulti karon.

Aron kini balaanon niya sa ginahinloan niya pinaagi sa paghugas sa tubig uban sa pulong,

²⁵ Karon, kining gamay nga teksto karong gabhiona, kung matawag ko man kini nga usa ka teksto. Ug nagatoo ako nga ang mga tawo dinhi, ug ang mga nakakonekta usab dinha sa telepono, dili kini pagaisipon ug hunahunaon nga gituyo kini sa paagi nga matampalason. Bisan pa man, nga ang paghisgot og teksto nga sama niini, daw sa matampalason. Ang hilisgutan nga akong gamiton alang karong gabhiona maoy: *Salaan Sa Usa Ka Tawong Nagahunahuna*. Daw sa sobra ra kaayo kini para sa usa ka hilisgutan, para sa usa ka ministro nga batok kaayo sa pagpanigarilyo, nga mogamit og usa ka teksto nga sama niana, *Salaan Sa Usa Ka Tawong Nagahunahuna*. Nahitabo kini, niadtong, miaging buntag sa diha nga nangayam ako og squirrel.

²⁶ Kung kamong mga tawo dinha sa—dinha sa mga radyo, sa pagsibya, o sa mga nakakonekta sa telepono, kung nakita lang ninyo ang hitsura sa mga nawong sa niining kongregasyon sa gisulti ko ang akong teksto, nangatawa gayud mo siguro. *Salaan Sa Usa Ka Tawong Nagahunahuna*.

²⁷ Bueno, nahitabo kini didto kon diin ang mga Manolunda sa Ginoo nagpakita kanako usa niana ka buntag, ug gisulti ngadto sa pagkatungha kadtong mga squirrel. Kamong tanan nakahinumdom kung kanus-a kadto nahitabo. Ug, usab, didto mismo sa tumoy sa bungtod kon diin nagatindog ako, kon diin kaniadto. . . sa wala ko pa giwala ang Pito Ka Mga Kapanahonan Sa Iglesia, sa pag-adto ko sa pagpangayam sa wala pa kadto nagbanagbanag. Didto ang. . . Abi ko nga pasidlak na ang adlaw, mga alas kuwatro kadto sa kabuntagon. Pagkatalagsaon; nakita ko kadtong Kahayag, ug milingi ako, ug didto ang Pito Ka Mga Tangkawan Nga Bulawan nga nagtindog didto sa tumoy sa maong bungtod, nga may sama sa usa ka balangaw nga nagaagi sa mga tubo ug nagatubil niini.

²⁸ Dihadiha pagkahuman niadto, nagpakita ang Ginoong Jesus kanamo. Ug niadtong tungora mismo nakadungog ako og usa ka Tingog nga miingon, “Si Jehovah sa Daang Tugon mao si Jesus sa Bag-o.” Ug mao kadto Siya, wala magdugay, nagpadayag na uyon sa maong Pito Ka Mga Tangkawan Nga Bulawan. Dayon himatikdi kana. Pila man ang nakahinumdom nianang teksto? Gisulat ko kini didto sa likod sa usa—sa usa ka sudlanan sa—sa kapsula sa mga bala nga anaa sa akong bulsa. “Si Jehovah sa Daang Tugon mao si Jesus sa Bag-o.” Ang Dios sa Langit nasayod gayud nga matuod kana.

²⁹ Sa dihang giadtoan ko kadto nga lugar kon diin nga nagpakita Siya kanako wala magdugay human niadto, sa pagpangayam og mga squirrel.

³⁰ Dayon sa gitawgan ko ang akong higalang, si Jack Moore, pipila ka bulan human niadto, aron mangutana; sa gisugdan ko nang iwala ang Pito Ka Mga Kapanahonan Sa Iglesia, sa Pinadayag 1. Ug nga atua Siya didto, nga ubanon kaayo; ang

Iyang buhok nga sama sa balhibo sa karnero. Unsaon man pagkahimo Niya, ingon nga trayntay-tres pa lang ang panuigon, ug ubanon na kaayo? Ug si Igsoong Moore, usa ka buutan kaayo, edukado, Cristohanong maayong lalaki, ug usa ka iskolar, usa sa pinakamaayo nga nailhan ko; ug miingon siya, “Igsoong Branham, si Jesus kana nga anaa na sa Iyang mahimayaong kahintang. Ingon niana karon ang hitsura Niya.” Apan daw sa wala kadto nakapauyon kanako. Ug nagpadayon ako sa pag-ampo hangtud usa ka adlaw . . .

³¹ Sa wala ko pa gisugdan ang Pito Ka Mga Kapanahonan Sa Iglesia, dili ko mahan-ay-han-ay kadtong ika-1 nga kapitulo. Unsaon man pagkahimo sa usa ka Lalaki, nga trayntay-tres ka tuig ang panuigon, nga nabanhaw sa mao ra nga lawas kon diin naila Siya kaniadto sa mga apostoles, nailhan nga Siya gayud; ug unsaon man pagkahimo Niya didto sa itaas, nga tingali usa na ka otsenta o nobenta na ang katigulangon, nga puno na ang Iyang nawong sa ubanon na kaayo nga balhibo, ug ang Iyang bungot ingon ka puti nga sama sa niyebe?

³² Nabasa ko diha sa Libro sa—sa Daniel, kon diin nga miabot siya ngadto “sa Tigulang sa mga Adlaw, Nga ang buhok ingon ka maputi sama sa balhibo sa karnero.” Nakita ko niadtong tungora kanang maong Tigulang sa mga Adlaw. Siya mao kadtong Tigulang sa mga Adlaw, ang mao sa gihapon kagahapon, karon, ug hangtud sa kahangturan. Kita n’yo, usa kadto ka simbolo, kaniadto.

Nganong puti man nga balhibo? Ug dayon akong . . . Mora og nakigsulti ang Balaang Espiritu kanako mahitungod sa usa ka retrato nga akong nakita usa ka higayon, mahitungod sa usa ka maghuhukom sa kaniadtong panahon. Dayon gisusi ko ang kasaysayan; gibalikan ko ang Biblikanhong kasaysayan ug tanan na, aron hibaloon. Ug ang tigulang nga mga maghuhukom kaniadto, sama sa labaw’ng sacerdote didto sa Israel, gikinahanglan nga aduna siya nianang puti, ubanon na nga buhok ug bungot nga sama sa balhibo sa karnero, tungod kay ang puti nga anaa sa ibabaw niya nagapatimaan nga siya mao ang labing hataas nga awtoridad sa mga maghuhukom sa Israel.

Ug bisan sa karong panahon, ug ngadto sa pipila ka gatus ka mga katuigan kaniadto, tingaling mga duha ka gatus ka tuig kaniadto, o dili man siguro ingon niana, mga ulahi na kay niana. Ang tanang mga maghuhukom sa Inglatera kaniadto, bisan unsa pa ka batan-on sila kaniadto o unsa man sila ka tigulang, pagmosulod na sila para sa paghukom, nagasul-ob sila og puti nga peluka; ug aron ipakita nga wala na’y uban pa nga awtoridad, sa nianang gingharian, nga molabaw pa sa ilang pulong. Ang ilang pulong mao na ang pinakalabing-hataas sa gingharian. Unsa ma’y ilang isulti, mao na gayud kana.

³³ Ug karon, niadtong tungora, nakita ko kana. Atua Siya didto, bisan nga usa ka batan-on pa nga Lalaki, apan nagsul-ob og puti nga peluka. Siya mao ang bug-os, labing hataas nga Awtoridad. Siya mao ang Pulong. Ug Siya aduna, nagasul-ob og puti nga peluka.

³⁴ Dayon, human niadto sa diha nga nahuman na namo, ug ang—ang sermon, ug miadto sa Kasadpan, ug sa diha nga ang mga Manulonda sa Ginoo mipakita didto para sa Pito ka mga Selyo, ug mipaingon kini ngadto sa kawanangan (nga aduna kita’y retrato niini dinhi, ug sa tibuok nasud), atua Siya didto, nga nakapeluka sa gihapon nga dala kadtong labing hataas nga awtoridad. Siya mao ang Ulo sa Iglesia. Siya ang Ulo sa Lawas. Wala gayu’y kapareho Niya, bisan asa man. “Gibuhat Niya ang tanang butang pinaagi Kaniya Mismo. Gibuhat Niya ang tanang butang para sa Iyang Kaugalingon, ug gawas Kaniya wala’y bisan unsa man nga nabuhat.” “Anaa Kaniya ang tanang awtoridad sa mga Langit ug yuta,” ug ang tanang butang Iyaha. “Ug diha Kaniya nagapuyo sa pagkalawas ang bug-os kinatibuk-an sa pagka-Dios.” “Ug ang Pulong Dios, ug nahimong unod sa taliwala nato.” Ug Siya mao ang Usa Nga nagpadayag sa bug-os nga tinago sa tibuok plano mahitungod sa kaluwasan, nga gihisgotan kaniadto sa tanang mga propeta ug sa manggialamon nga mga tawo. Siya lamang kanang Usa nga nakapeluka ug ang labing hataas nga Awtoridad.

³⁵ Karon, mihunong ako, didto sa bungtod sa miaging buntag, mora og adunay mga squirrel didto nga anaa sa katalagman. Ug milingkod ako. Ug pila pa lang ako ka gutlo didto, sa diha nga, milihok ang mga kahoy duol kanako, ug usa ka dakung tawo nga may dala og usa ka di-doble tubo nga riple ang nagalakaw didto sa mga kahoykahoy, ug medyo nakapahadlok kaayo kadto kanako. Pagmolakaw ako, dalidali nga mohawa; nahadlok ako nga mobalhin, nahadlok ako nga mapusil niya ako. Ug nagalihoklihok ang mga kahoykahoy, busa pabilin na lang ako nga mipuyo.

³⁶ Usa ka squirrel ang miadto didto sa bungtod, ug gihurot niya sa niini ang iyang mga bala. Ug busa wala niya kini naigo, ug busa mikalagiw ang maong squirrel gikan didto sa bungtod. Sa hunahuna ko, “Karon mohawa na ako; nga nagalanog pa ang tibuok nianang kasaba. Iya pang gidiskargahan ang iyang pusil.”

Ug mihawa ako sa bungtod, ug gipusil sa maong lalaki ang dapit nga didto mismo sa atubangan ko. Nagpaliso kadto kanako pabalik sa *niining* direksyon. Ug miadto ako sa *niining* dapit, aron mopaingon ngadto sa laing direksyon, ug mibuto ang usa ka .22 ka riple, ug mihadyong ang mga bala sa ibabaw ko. Ingon ko, “Grabe, ania gayud ko sa dili-maayong lugar.”

³⁷ Busa mibalik ako ug milugsong didto duol sa suba. Ug sa hunahuna ko, “Molugsong ako dinhi ug magtago hangtud nga mahuman sila, aron nga makagawas na ako.” Ug sa didto na ako sa dalan, nabantayan ko. . . Naagda ang akong pagtagad aron motan-aw didto sa tuo ko nga bahin. Ug, sa pagtan-aw ko, aduna didto og usa ka walay sulod nga pakete sa sigarilyo nga gilabay sa usa sa niadtong mga tawo, niadtong paggukod sa. . . sa diha nga nagpalagiw ang mga squirrel sa niadtong mga kahoykahoy.

³⁸ Ug gipunit ko kining usa ka pakete sa sigarilyo, ug natan-aw ko. . . Wala ko diay kadto gipunit; pasayloa ko ninyo. Gitan-aw ko kini. Wala ko kadto gipunit, tungod kay dili ko gusto ang baho sa nianang mga butang, sa sugod pa lang. Ug gitan-aw ko kini didto, ug kini usa—usa kadto ka kompaniya sa sigarilyo nga siguro dili ko na kini kinahanglan pa nga nganlan, apan mahibal-an ninyo. Nag-ingon kini didto, “Salaan sa usa ka tawong nagahunahuna ug panilaw sa usa ka tawong nagapanigarilyo.”

Gitan-aw ko ang maong butang, ug sa hunahuna ko, “Salaan sa usa ka tawong nagahunahuna?” Nahunahunaan ko, “Kung nagahunahuna man lang ang mao nga tawo, dili gayud unta siya manigarilyo. Unsaon man niini pagkahimong ‘salaan sa usa ka tawong nagahunahuna’? Ang tawong nagahunahuna dili gayud manigarilyo.” Sige.

³⁹ Karon, sa hunahuna ko, “Daw sa unsa gayud ka malimbongon kana!” Karon, Amerikano kanang mga kompaniya sa sigarilyo. Ug oh, kung magkinabuhi lang kita nga uyon sa atong mga prinsipyo, manglimbasog kita aron tabangan ang usa’g usa, kung aduna man kita’y pagbati sa usa’g usa. Ug daw sa unsa ka hipokrito gayud! Ang hinungdan nga wala ko gisulti ang ngalan sa maong kompaniya, kinahanglan kong magsulti og pipila ka dili maayong mga butang mahitungod kanila. Ug mamahimong hipokrito kaayo ang si kinsa man, aron lang nga makapanguwarta?

⁴⁰ Ang tawong nagahunahuna dili gayud manigarilyo. Apan daw sa unsa na ka nahulog niini ang kadaghanang mga Amerikano; nagadahum sila nga pagkamaanindot niana!

⁴¹ Karon tan-awa, dili ninyo mahimo, dili ninyo mahimong. . . Pangutan-a si kinsa man, ang mga siyentista, inyong. . . Dili kamo mahimong manigarilyo nga walay alkitran. Pag-aduna og usa ka gamay’ng aso nga nagagawas, alkitran kana. Ug pagwala ka’y makuha og unsa man nga aso, bueno, wala ka’y makuha og unsa nga alkitran, ug wala ka’y makuha niini og bisan unsa man. Nagakuha ka lang gikan sa usa ka solidong sigarilyo. Apan basta nga may makuha ka og unsa man lang nga aso, nagalanghab ka og kanser, nicotine.

⁴² Kung nakauban ninyo ako sa miaging tuig, o niadtong tuig sa wala pa kadtong miagi, nagtoo ko nga mao kadto, didto sa

World's Fair, sa diha nga si Yul Brynner ug silang tanan atua didto sa mga pagpasundayag, ug makita mo silang ginakuha kadtong sigarilyo, gipasulod kini sa usa ka butang, ug gibira kini aron ibutang diha sa usa ka marmol. Ug mikuha kadtong doktor og usa ka pahid-ikulkog, gipaligid kini didto ug gikuha ang nicotine pinaagi niini, ug gibutang kini sa likod sa usa ka puti nga ilaga, ug gisulod kini sa usa ka hawla. Ug matag pito ka adlaw ginapagawas kini. Ug ang maong ilaga puno na kaayo sa kanser nga dili na kini makalakaw, tungod lang sa nicotine nga gikan sa usa ra ka sigarilyo.

⁴³ Dayon miingon siya, “Kabalo ka, nagaingon sila nga matangtang mo kini pinaagi sa usa ka salaan,” Ingon niya, “Dili ka mahimong magkaaduna og usa ka salaan. . . Ang unsa man nga salaan nga motangtang og nicotine, makatangtang og aso,” miingon, “tungod kay kinahanglan nga aduna ka’y aso. . . nga aduna ka’y alkitran aron magka-aso, ug ang alkitran ang nagahatag og kanser.”

⁴⁴ Ug dayon miadto siya, gitangtang kini pinaagi og tubig, ug miingon, “Usahay maghunahuna kamo nga mahimo ninyo kining salaon.” Miingon, “Sa matag higayon, niana, bisan sa asa mo pa kini tangtangon.” Miingon, “Nagaingon sila, ‘Wala ko man kini ginalanghab,’ dayon isulod nila kini sa ilang baba ug iluwa.” Dayon gikuha niya kadto ug gipaligid kini didto, ug gibutang kini ilalum sa kung unsa nga butang didto, ug nagpakita nga kanser kadto sa gihapon. Unsa ma’y inyong ginabuhat? Ginatulon kini diretso ngadto sa inyong tutunlan. Kita n’yo? Ug bisan unsa pa man ang ginabuhat ninyo, kamatayon kini sa gihapon. Kita n’yo?

⁴⁵ Ug dayon ang hunahunaon nga usa ka kompaniya manglimbong og tawo, o sulayan nga limbongan ang kaugalingon nilang isigkalungsuranon. Sama kini sa buwitre nga gikinabuhian ang ilang, ang mismong ka-matang niini. Pagpanguwarta, nagabaligya og kamatayon ngadto sa—sa nasud, ug ngadto sa batan-ong mga kalalaken-an. Ug moadto didto sa natad mismo sa panggubatan ug mamatay alang kanila, dayon motalikod ug mangbaligya og usa ka butang nga sama niana, ilalum sa usa ka malimbongan nga pasumangil, “Salaan sa usa ka tawong nagahunahuna, apan panilaw sa usa ka tawong nagapanigarilyo.” Kinahanglan ka nga magkaaduna ka og aso aron makuha mo ang panilaw. “Panilaw sa usa ka tawong nagapanigarilyo.”

⁴⁶ Daw sa unsa nga nagakadani ang mga tawo niini, bisan pa man! Nakuha nila kini. Karon, limbongan lang kamo niini og dugang. Kita n’yo, iya kini sa yawa. Wala sila’y pagtagad sa inyong kinabuhi. Wala sila og unsa man nga pagbati alang kaninyo. Ginabaligyaan kamo nila og ingon nianang butang aron lang nga tan-awon kamong mamatay, basta nga makapanguwarta lang sila.

⁴⁷ Sama lang sa pulitika ug giyera. Wala ako nagatoo og giyera. Wala ako nagatoo nga kitang tanan kinahanglan magkaaduna gayud og giyera.

Nagatoo ako diha sa daku nga Ginghamian nga pagadalhon sa Dios, ang dakung sibilisasyon nga pagadalhon dinhi ilalum sa Kaugalingon Niyang halangdong kagamhanan; dili na magkaaduna pa og usa na usab ka giyera. Ang nasud dili mobakyaw og mga bangkaw batok sa mga nasud. Maanaa silang tanan sa pakigdait, pakigdait nga Walay Katapusan.

⁴⁸ Busa kini nga matang sa sibilisasyon nagadala og giyera. Ug sa dugang natong pagka-sibilisado, sa ilalum niini, nagakaaduna kita og dugang pa nga giyera. Ang usa nagapaninguha nga mamahimong mas sibilisado kay sa uban, ug ang dugang nga pagkasibilisado nagahatud og dugang pa nga giyera. Kita n'yo?

⁴⁹ Ug tan-wa kung unsa na, ilalum sa niini nga sibilisasyon, nga usa ka tawo ang magmantala og usa ka butang nga sama niana. Ug ang bugtong butang nga ginahimo niini, ginalimbongan lang kamo niini aron papaliton kamo og dugang pa nga mga sigarilyo. Kay kung ang usa ka tawo nagapanigarilyo . . . Ug nagatoo ako nga iya kini sa yawa, ug aduna og usa ka nicotine nga yawa sulod sa usa ka lalaki ug, o sa usa ka babaye. Ug kung mapatagbaw sa usa ka sigarilyo kanang nicotine nga yawa hangtud nga pasagdan ka na niini ug undangon na ang pagpangita kanimo, pinaagi sa usa ra ka sigarilyo. Ug dayon mogamit kamo og usa ka salaang, nga magpalusot og usa ra sa tulo sa nianang aso dinha, o magpalusot og usa ra sa tulo sa nianang nicotine dinha, kung ingon-ana magkinahanglan kini og tulo ka mga sigarilyo aron mapulihan kanang usa, ug panigarilyohon mo ang tulo puli sa usa.

⁵⁰ Kita n'yo, usa lamang kini ka—usa ra ka lingla, usa ka paglimbong, usa ka lingla sa pagpaninguha nga makabaligya pa og mga sigarilyo. Makabaligya sila og daghan pa sa nianang paagi kay sa mahimo nila kaniadto pinaagi sa pagtugot sa tawo nga panigarilyohon og direktso ang maong tabako diha sa iyang kuwako o sa iyang sigarilyo. Karon, kita n'yo, iya kini sa yawa.

⁵¹ Samtang nga nagatindog ako didto nga nagatan-aw niini, ug ginahunahuna kung daw sa unsa kadto ka malimbongan, miabot kanako ang pangutana. Ug miduko ako balik, gitan-aw pag-usab ang maong pakete, ug akong . . . daw sa may butang nga misulti kanako, “Apan okey ra ang maong panultihon, ‘salaan sa usa ka tawong nagahunahuna, panilaw sa usa ka tawong nagapanigarilyo.’” Miabot kanako nga kana nga kamalimbungan, usab, sa tabako diha sa natural nga hilisgutan, usa kini ka butang nga sama sa kahimtang sa mga kaiglesihan sa karon, kita n'yo, usa ka kalimbongan.

⁵² Miabot kini sa punto hangtud nga ang tibuok kalibutan nahimo na nga usa ka dakung kalimbongan sa kung unsa gayud ang matuod ug kung unsa ang husto. Kita n'yo, bisan sa pulitika, ug diha sa mga butang pang-katilingban, diha sa eskwelahan, sa tanan nang butang, nahimo na kini nga kalimbongan.

⁵³ Usa ka batan-ong lalaki ang nag-estorya kanako sa miaging gabii nga didto siya kaniadto sa usa ka kampo sa mga kasundalohan, ug may usa ka batan-ong sundalo ang naligsan sa usa ka tangki; ang iyang mga bagà, ang iyang tiyan, o unsa man kadto, nangatusoktusok. Ug miadto sila sa hospital; aduna sila ug tulo o upat ka mga doktor ang nagaatiman didto sa linya, ug nakalinya didto ang tanan. Ug ginakugon niadto sa duha o tulo ka mga sundalo ang maong kauban nila, ug siya nga halos dili na makaginhawa . . . Sa matag higayon nga moginhawa siya, motusok kadto nga gusok diretso sa iyang baga, ug magpadugo kadto kaniya sa sulod. Ug gipasagdan lang nila kadtong batan-on nga lalaki nga nakatindog didto sa maong linya, didto mismo nga ulahi na sa linya, ug tugotan kadtong, ang uban kadtong nga tawo nga wala og bisan unsa man gawas sa sakit lang sa dalunggan o unsa man, nga modiretso.

⁵⁴ Ug niadtong mga oras nga miabot na siya didto, usa ka koronel ang misulod nga may dala og usa ka bata nga adunay nukanuka, gamay'ng batang lalaki o babaye kini nga may nukanuka sa kamot nga anak sa koronel. Ug gipahunong nila kadto nga linya, aron ipasulod ang anak sa mao nga koronel, ug didto kadtong batan-on nga lalaki nga nagkatusoktusok, naghimalatyon na. Tan-awa.

⁵⁵ Oh, kung aduna lang kadto nga koronel og tinuod nga pagbati alang sa iyang igsoong lalaki didto sa linya, misulti unta siya, "Makahulat kini nga bata. Dalha ninyo dinhi kana nga lalaki sa madali, buhata ninyo ang unsa man alang kaniya!"

⁵⁶ Apan gusto sa kada tawo nga ipakita ang iyang awtoridad. Karon, dili man silang tanan nga ingon niana; dili, dili silang tanan sama niana. Apan adunay daghan kaayo nga sama niana. Adunay daghan kaayo kanila nga sama niana. Apan ang maong lalaki, ang butang lang nga iyang gihunahuna, mao ang kaugalingon niyang anak nga lalaki nga may nukanuka sa kamot niini, ug wala gihunahuna kadtong makalolooy nga batan-ong nagatindog didto nga nadugmok ilalum sa tangki, sa mismong tangki ug tingali ang mismong batan-on nga mahimong moluwas sa iyang kinabuhi sa umalabot pag-didto na sa natad sa panggubatan. Kita n'yo, wala sila nagahunong aron maghunahuna; ang ila lang mga kaugalingon.

"Salaan sa usa ka tawong nagahunahuna."

⁵⁷ Gitan-aw ko kini, ug sa hunahuna ko, "Butang kini nga sama sa—sa mga denominasyon sa karon, ang mga kaiglesiahan nga aduna kita." Ang matag usa kanila aduna og ilang kaugalingong

salaan; aduna sila og kaugalingon nilang matang sa salaan. Ginapasulod nila kung unsa lang ang gusto nila, ug kung unsa ang dili pasudlon; kung unsa ang ilang salaon pasulod ug salaon pagawas, gamit ang kaugalingon nila nga matang sa salaan. Daghan kaayong mga iya sa kalibutan ang basta-basta na lang nila ginapasulod aron mapahalipay ang mga dili-magtotoo nga anaa dinha. Pasudlon nila sila walay sapayan kung unsa pa sila, kung aduna sila og kuwarta. Pasudlon nila sila walay sapayan kung unsa pa sila, kung mga popular sila.

Apan adunay usa ka butang ang bahin niini, dili ka makasulod sa Iglesia sa Dios nga sama niana; dili sa denominasyon ha, ang pasabot ko ang tinuod, matuod nga Iglesia sa Dios.

⁵⁸ Sama sa mga kompaniya sa tabako sa karon, ang mga tawo nga nagasulod sa niining gisulti na nga mga kaiglesiahan o mga denominasyon, aduna sila og panilaw, ug kana nga panilaw mao ang mga klasiko sa kalibutan. Ug ang matag denominasyon aduna og ilang kaugalingong salaan, ug ilang salaon pagawas ang tanan nga matuod nga mga Cristohanon nga magsulti og “amen” sa diha nga nagawali siya; ug ginapasulod ang tanan nga mga mugbo’g buhok, pinintalan ang nawong nga mga Jezabel nga anaa sa nasud, basta lang nga sila popular. “*Si ingon-ani ug si ingon-ana* nagasimba baya sa among . . . usa siya ka artista, usa ka bantugan nga tawo.” Ingon niana nga matang sa usa ka salaan ang ilang gigamit. “Ang among denominasyon. *Si ingon-ani ug si ingon-ana*, ang presidente, o ang—o ang koronel, o si kinsa man maoy miyembro sa among denominasyon.” Nakita n’yo na ba kung unsa nga matang sa salaan ang ilang gigamit? Kana nga salaan, siyempre, iya sa kalibutan, mga tawong iya sa kalibutan.

⁵⁹ Ang maong mga tawo, nasayod sila kung unsay ilang gusto. Busa kung kinahanglan nila nga makuha kung unsay ilang gusto, kung ingon-ana kinahanglan nga magkaaduna sila og usa ka matang sa salaan, ug igo nga makalusot ang kalibutan, aron nga matagbaw ang kalibutanon nilang mga panilaw. “Salaan sa usa ka tawong nagahunahuna, panilaw sa usa ka tawong nagapanigarilyo.” Salaan sa usa ka relihiyosong kalibutan, ug panilaw sa usa ka tawong kalibutanon.

⁶⁰ Gusto nila nga mamahimong relihiyoso. Nagahunahuna sila nga kinahanglan nila nga mamahimong relihiyoso, tungod nga aduna sila’y kalag.

⁶¹ Sa una natong pag-abot sa niini nga nasud, nakaplagn ninyo ang mga Indian nga nagasimba sa adlaw ug sa uban pa, tungod kay (ngano man?) usa siya ka tawo. Balik kita didto sa lagyong mga kalasangan sa Africa, makita nato ang mga lumad didto nga nagasimba sa usa ka butang. Ngano man? Mga tawo man sila, ug gusto nila, nga kinahanglan magsimba.

62 Busa ang tawo, walay sapayan nga siya nahulog, nasayod siya sa gihapon nga aduna gyu'y usa ka butang sa kon asa man. Apan aduna siya og usa ka panilaw para sa kalibutan, nga dili niya mahimong gamiton ang hustong salaan. Kinahanglan nga magkaaduna siya og kaugalingon niyang hinimo nga salaan. Ang matag usa nagahimo og kaugalingon nilang matag sa salaan.

63 Ginapanghambog sa matag kompaniya sa sigarilyo ang sa ilaha, sa kung unsa ang mahimo nila, "Usa ka tinuod nga salaan! Kini mao ang pinakamaayong salaan! Nagapanguna sa tanan!" ug tanan na nga sama niana. Miingon, "Ang kalami," o sama niana, "anaa sa unahan." Oh, kalooy intawon. "Sa unahan"? Unsa man diay ang anaa sa likod nga bahin niini, bisan pa? Siguradong dili kini usa ka lalaking nagahunahuna o usa ka babayeng nagahunahuna. Apan mao kana ang ilang ginaingon, ginalimbongan lang ang mga tawo.

64 Karon makita nato, bahin sa atong panahon, nga adunay usa ka panilaw ang mga tawo. Ug ngano man nga moyupyop ang usa ka tawo og sigarilyo? Aron nga tagbawon ang usa ka panilaw. Para man sa unsa nga moyupyop ang usa ka babaye og sigarilyo? Tagbawon ang usa ka panilaw.

65 Ug dayon kung nahibaloan na sa iglesia, usa ka relihiyosong pundok, ilang. . . aron nga mapasulod ang mga tawo dinha, kinahanglan nga magkaaduna sila og usa ka matag sa salaan aron ihatag sa maong mga tawo ang panilaw nga gusto nila. Busa kung dili nila makuha ang unsa man nga panilaw nga gusto nila, ayaw nila sa mao nga sigarilyo. Ug kung dili nila makuha ang panilaw nga gusto nila sa relihiyon, ayaw nilang dawaton ang mao nga relihiyon. Karon, ingon lang gayud kini ka tataw nga mahimo niini.

66 Mga babayeng naka-short, mugbo'g mga buhok, pinintalan nga mga nawong, nagbisti og mahilas, gusto nila kana. Gusto gayud nila kana.

67 Sama sa akong gihisgotan kaganinang buntag ug sa buntag sa miaging Dominggo, mahitungod nianang ligid diha sa tunga sa ligid, o kanang gamay nga kalag sa sulod nga anaa sa sulod sa espiritu. Unsaon man pagkahimo sa espiritu nga anaa sa gawas, tali sa kalag ug lawas, nga madihogan sa Espiritu Santo. Nasabtan ba ninyo tanan kadto? [Nagaingon ang kongregasyon, "Amen."—Ed.]

68 Karon aron mapasundan kana pinaagi sa pagpadayon sa Mensahe, *Ang Dios Sa Niining Kalibutan, Ang Mga Dinihogan Sa Kaulahiang Mga Adlaw*. Kanang sa gawas, kanang sa tunga nga lingin. . . Ang unang lingin mao ang—ang tawhanong mga igbabati. Ang ikaduhang lingin mao ang igbabati sa espiritu; kabubut-on, kinaugalingong pagbuot, pangandoy, ug uban pa. Apan ang anaa sa sulod mao ang kalag; kanang kalag predestinado.

Busa, mahimo nilang madihogan kining espiritu aron mapailalum kining lawas nga anaa sa gawas ngadto sa espiritu. “Apan ang kalag nga nagakasala, kana nga kalag mamatay.” Ang kalag nga nagasalikway, diha sa dili-pagtoo, sa Pulong sa Dios, nga kini kabahin unta niini, kana nga kalag sa Eternal. . . kaniadto pa, sa una pa lang.

⁶⁹ Nagatoo ako sa usa ka Eternal nga kamatayon, pareho ra nga nagatoo ako sa Eternal nga Langit, apan dili sa Eternal nga impiyerno. Walay ingon niana nga butang nga sama sa Eternal nga impiyerno. Adunay Eternal nga kamatayon alang sa mga tawo nga. . . Daghan kanila, ang mga relihiyoso, sa kalibutan karon, nga patay na sa una pa lang.

⁷⁰ “Ang babaye nga nagapatuyang sa kalipayan,” nga mubo ang iyang buhok ug pinintalan ang nawong, “patay na samtang siya buhi pa.” Ingon niana ang sulti sa Biblia. Kita n’yo? Kita n’yo, mahimong relihiyoso siya, apan sukad pa dili gayud siya luwas. Aduna siya’y pang-gawas nga mga buhat. Mahimong nagakanta siya sa choir, o mahimong nagasayaw siya diha sa Espiritu, mahimong nagasulti siya sa laing mga dila, ug aduna ang tanan nga mga pagpakita nga iya sa Espiritu. Apan gawas kung kana nga kalag nga anaa sa sulod maoy babaye nga anak sa Dios, kita n’yo, patay siya, bisan unsa pa man ang iyang ginabuhat.

⁷¹ Ang Israel kaniadto espirituhanon tanan sa panggawas, puno tanan sa kamaayo sa Dios, ug kung giunsa nila kaniadto pagsimba sa Dios, ug uban pa, apan wala kadto magpulos. Ang ilang kinasuloran dili makaila sa Pulong Mismo.

⁷² Apan pagnatawo kamo sa Espiritu sa Dios, kung ingon-ana aduna kamo og usa ka . . . usa ikaw ka anak sa Dios, ug usa ikaw ka anak sa Dios sa una pa, ug usa ikaw ka anak sa Dios sa tanang panahon. Walay paagi nga ihimulag kini, tungod kay kini. . . aduna ka’y Kinabuhing Walay Katapusan. Ug ang pagka-Walay Katapusan wala gayud may gisugdan; wala gayud usab kini katapusan.

⁷³ Oh, tungod gayud sa grasya sa Dios, nga ginahatagan Niya kita og pagsabot mahitungod sa maong dagkung mga tinago! Sama sa gihisgotan ni Pablo dinhi, dinha sa mga Taga-Efeso sa ubos pa, nga nagahisgot mahitungod sa bana ug asawa, ug miingon, “Usa kini ka tinago,” kung unsa nga ang mga babaye kinahanglan nga magtahud sa ilang mga bana. Bisan sa ikaduhang dapit, nagatoo ako niini, sa tibuok Biblia, nga gikahisgotan sukad ang ingon nianang pagtahud. Miingon, “Ang mga babaye, kinahanglan nga ginatahud niya ang iyang bana, ginatahud ang iyang bana.” Dayon ang bana kinahanglan nga magkinabuhi og usa ka pagkinabuhi diha sa atubangan sa iyang asawa aron nga mahimo siyang tauron sa iyang asawa ingon nga usa ka anak sa Dios. Ug kung wala niya gikinabuhi kana nga matang sa pagkinabuhi, bueno, kung ingon-ana, siyempre,

dili siya pagatahuron sa asawa, tungod kay nasayod siya kung unsa gayud ang iyang bana. Apan pag usa kini ka lalaki nga talahuron nga tawo, talahuron ug mahinlo, sa iyang asawa ug sa atubangan sa iyang pamilya, usa ka tinuod gayud nga alagad sa Dios, kung ingon-ana ang mga kababayan-an, ang mga anak, ug tanan na, kinahanglan nga magtahud sa nianang alagad sa Dios, nga may kataha.

⁷⁴ Himatikdi karon. Ang mga babaye, gusto nila ang magpamugbo'g buhok. Gusto nilang magsul-ob og mga short, mag-pintal, magmeyk-ap. Kining gagmay'ng mga bikini ug ingon-anang mga butang nga ilang—ilang ginasul-ob sa karong panahon, gusto nila kining buhaton; ug bisan pa niana gusto nilang magsimba. Nakita ba ninyo kana nga pagdihog ngadto sa espiritu, dili ngadto sa kalag. Kita n'yo?

⁷⁵ Ang ingon, gusto nga mamahimong Cristohanon ug buhaton usab kini nga mga butang, ug nagaingon ang pastor nga okey ra kini. Dayon kung moingon siya nga okey ra kini, “Mahimo kang usa ka miyembro; mahimong ilista ang imong ngalan dinhi sa listahan sa akong iglesia; okey ra,” kung ingon-ana ginahatag niya sa maong babaye ang iyang denominasyonghong salaan aron mouyon sa kalibutanong panilaw sa maong babaye. Nahigugma man siya sa kalibutan; gusto niya ang panilaw niini. Busa aduna ang maong pastor og usa ka salaan para kaniya, apan halayo ra kaayo siya ingon nga usa ka babayeng nagahunahuna. Apan tan-awa n'yo. Dinha ko nakaplagan kini nga teksto.

⁷⁶ Dili, dili siya usa—usa ka babayeng nagahunahuna. Kung nagahunahuna pa siya, mahibaloan niya unta nga dili ang iglesia ang magahukom kaniya sa kaulahiing Adlaw. Ginahukman siya karon sa iglesia pinaagi sa iyang pagpamiyembro, sa iyang pagkamadapigon ngadto sa mga pundok nga iyang gikamiyembrohan ug sa mga kapunongan. Ila siyang ginahukman karon pinaagi niana. Apan pagahukman siya sa Dios didto sa kaulahiing Adlaw. Busa wala siya nagahunahuna.

⁷⁷ Sama lang sa tawo nga nagapanigarilyo; gimahal niya og ayo ang sigarilyo hangtud nga ang kagahum niya sa pagpanghunahuna naminhod na tungod sa nicotine. Ug ang pangibog sa babaye maoy nagpaminhod og ayo sa kagahum niya sa pagpanghunahuna hangtud nga buhaton na niya kining mga butang nga dautan sa atubangan sa Ginoo, tungod kay gusto niyang buhaton kini; nagapatagbaw kini sa panilaw sa usa ka kalibutanong babaye. Busa ginadawat niya ang salaan sa usa ka kalibutanong iglesia; dire-diretso niyang ginalahusan kini, maayo, walay kaproble-problema. Nagapakita lang . . .

⁷⁸ Karon makita nato dinha nga Kamatuoran kana. Ug moingon ang pastor, “Okey ra kana. Wala nato ginakondena ang mga babaye nga nagahimo niana. Okey ra kana.” Adunay igong kasal-anan niini; kanang pagpaagi sa iyang salaan. Nagapakita

lang nga miagi sila sa usa ka teolohikanhong salaang. Ug naangkon nila ang usa ka teolohikanhong panilaw; ug aduna na sila og teolohikanhong panilaw. Apan siguradong wala kini moagi sa Salaan sa Dios. Wala, sir.

⁷⁹ Karon, kung adunay usa ka teolohikanhong salaang para sa teolohikanhong tighunahuna, ug adunay usa ka pang-iglesiang salaang para sa pang-iglesiang tighunahuna, usa ka pang-sigarilyong salaang para sa nagapanigarilyong tighunahuna, aduna gyu'y usa ka tinuod nga salaang sa kon asa man para sa usa ka tinuod nga tighunahuna. Ug ang Dios adunay usa ka Salaang, ug kana mao ang Iyang Pulong. Usa kini ka tigpabulag, kay ang mga tubig Kini sa pagkabinulag alang sa sala. Karon, mao kana ang panilaw sa tawong nagahunahuna o sa tawong balaang.

⁸⁰ Ug kung ang usa ka tawo nagaagi sa nianang matang nga salaang nga iya sa kalibutan, siya—aduna siya'y kalibutanong panilaw. Ug sama sa kompaniya sa tabako, nagakaaduna siya og daghan pang mga miyembro sa iyang iglesia pinaagi sa pagpaagi kanila sa niini nga salaang. Kung moingon sila, “Adunay mas daghan nga mga babaye ang nagasimba kay sa mga lalaki.” Mahimong ingon niana kini. Karon, mahimong tinuod gayud kana, sa dihang makasimba siya ug mahimo ang bisan unsa man nga gusto niya. Husto kana. Buhaton niya, magpamiyembro siya sa bisan unsa man, basta moagi lang siya nianang salaang sa simbahan. Kung miagi siya sa Salaang sa Dios, mogawas siya nga lahi kay sa niana. Kita n'yo? Dili siya makalusot sa Salaang sa Dios ug mogawas nga mubo ang buhok. Dili niya gayud mahimo kini.

⁸¹ Karon mamahimo kining usa—usa ka medyo mapait tingali sa kang kinsa man. Apan sa diha nga nagaagi na siya sa Salaang sa Dios, ug nagaingon Kini dinha para kanila nga dili sila magpapatul sa ilang buhok, dayon (unsa na?) mobalhin siya og mopasilong didto sa pikas. Kung nagsulti Kini nga sala para sa usa ka babaye nga buhaton ang ingon niana, ug makauulaw gayud siya nga buhaton kana.

“Kung gusto man niya,” moingon ang pastor, “bueno, puede gayud niyang paputlan ang iyang buhok.”

Miingon, kung ingon-ana, “Ipaupaw na kini kung ingon-ana.” Ug miingon, “Nasayod kita nga makauulaw kana para sa usa ka babaye sa pagpaupaw sa iyang ulo.” Miingon, “Kung ingon-ana magpandong siya.” Ug ang iyang buhok mao ang iyang igpapandong; dili nga kalo, gining. Ang iyang buhok mao ang iyang igpapandong, ang ingon sa Biblia. Husto. Nagapakita nga usa siya ka Nazareo ngadto sa Ginoo. Ang hataas nga buhok, para sa usa ka babaye, nagakahulogan nga usa siya ka Nazareo ngadto sa Ginoo. Karon, makita nato nga matuod kana.

⁸² Apan makita nato nga kung ang tawong nagahunahuna, kono para sa kalibutan, makapanigarilyo ug sa gihapon

matagbaw ang iyang panilaw, angay lang nga aduna siya'y igong salabutan nga mahibaloan nga alkitran ang iyang makuha gikan sa tabako. Apan kini mao lang, unsay gihimo niini, mao nga baligyaan siya og dugang pa, papaliton siya og dugang pa nga mga sigarilyo.

⁸³ Ug ginakuha sa salaan sa iglesia ang mga pagpamiyembro ug mga butang nga sama niana sa diha nga ginapalusot nila sila nga bisan unsa na lang ug nga mga miyembro sa gihapon sa iglesia, nagaangkon sila og dugang pa nga mga miyembro. Unsa kaha kung moadto kita sa mga kasimbahanan karong gabhiona ug salaan ang tanan pagawas walay labot kadtong mga tinuod gayud nga mga natawo diha sa Pulong nga mga Cristohanon. Magkaaduna og daghang blangko gayud nga mga sermon sa bongbong karong gabhiona, matuod kini, tungod kay miagi kini sa maong Salaan.

⁸⁴ Ug kung aduna ako og usa ka pangandoy sulod sa akong kasingkasing, ug nagalaum ako nga ang tanan nga nagapaminaw kanako aduna og mao ra nga butang, "Dios, ipaagi ako sa Imong Salaan." Sama sa giingon ni David, "Sulayi ako, ug sutaa ako, ug tan-awa kung aduna ba'y pagkadautan kanako, dayon tangtanga kini, Ginoo." Kita n'yo? Gusto ko ang Salaan nga iya sa Dios. Wala ko'y labot kung unsa man ang ginahimo sa kalibutan, kung unsa man ang ginabuhat sa iglesia; gusto ko nga mamahimong usa ka tawong nagahunahuna, nga hunahunaon kung Kinsa ang magatindog sa tupad ko usa sa niining mga adlaw, para sa Paghukom.

⁸⁵ Himatikdi, ginabuhat kini sa kompaniya sa tabako aron makabaligya og dugang pa nga mga sigarilyo; ginabuhat kini sa iglesia aron makakuha og dugang pa nga mga miyembro. Ang babayeng mubo ang buhok, nagasul-ob og mga short, masakpan gayud sa Salaan sa Dios. Dili siya makalusot Niini, nga mubo ang buhok, tungod kay nag-ingon ang Biblia nga dili niya kini angay buhaton. Iyang ginapakaulawan ang iyang ulo pagbuhaton niya kini. Kinahanglan nga nakahibalo kita niini. Apan makalusot siya mismo sa iglesia nga okey ra, ang tanan pang uban kanila. Nagabarug ako usahay . . .

⁸⁶ Dili sa dili-pagbalibali sa kang kinsa man; wala gayud ako may gihisgotan og personal mahitungod sa kang kinsa man nga tawo, apan ang kasal-anan kini sa iglesia. Mapamatud-an ninyo ako niana. Wala ko may gisulting, "Si Miss *Ingon-ani ug ingon-ana* baya *ingon-ani ug ingon-ana siya*, o Si Mr. *Ingon-ani ug ingon-ana*, o si Rev. *Ingon-ani ug ingon-ana* baya *ingon-ani ug ingon-ana siya*." Wala, sir. Ang ginasulti ko nga kasal-anan ang kasal-anan. Kung kini anaa man sa pamilya ko, anaa man kanako, anaa man kini kang bisan kinsa, sala kini sa gihapon. Dili nga usa ka indibiduwal, wala ako nagasulti batok sa mga indibiduwal. Nagasulti ako batok sa kasal-anan. Dili ko igsapayan kung ako man kini o bisan kinsa man, mag-agi lang sa

Salaan sa Dios, ang bisan unsa man nga sala ang magpahunong mismo kanimo dinha.

⁸⁷ Himatikdi. Apan ang babaye nga gustong magkaaduna og mubo'g buhok ug magsul-ob og mga short, o magmeyk-ap ug unsa man, mahimo siya nga diretsong moagi sa salaang Pentecostal sa ingon ka masayon-sayon, wala ni bisan unsa man niini, diretso ngadto sa kamatayon. Tungod, siya ang... Moingon ang maong babaye, "Bueno, wala ma'y dautan niana."

"Kung nahigugma ka sa kalibutan o sa mga butang nga iya sa kalibutan, tungod kini nga ang gugma sa Dios wala man lang kanimo."

⁸⁸ Sa kinasuloran niini nga espiritu, dayon, mahimong moadto pa sa iyang kalag, mga butang nga dili iyaha sa Dios ug batok sa Pulong sa Dios, kung mao man gayud kana ang panilaw diha sa maong kalag. Mahimo kining moagi sa mga panilaw; *igtatan-aw, igtitilaw*... Mahimo kining moagi sa *panghunahuna*, pinaagi sa *pagpangatarungan*, "Wala ma'y dautan niini. Aduna ko'y panilaw. Aduna ko'y mga igbabati. Mabati ko nga okey ra kini." Mahimo siyang moadtang diretso dinha niana, ug diretso ngadto sa iyang kalag, kung sa ingon niana gayud nga matang ang iyang kalag. Nagapakita lang nga wala siya nagaagi sa Salaan sa Dios.

Pero kung mubo ang iyang buhok, nagapang meyk-ap, nagasul-ob og mga short, mga karsones, mora'g iya na sa lalaki kon tan-awon, tanan na niining mga slack ug unsa pa man ang tawag nila niini; ginasulti kadto nga matang sa mga butang, ug ginabuhat kadtong mga butanga, ug nagakinabuhi para sa kalibutan, masikup siya; dili siya makaagi Dinha. Dili, sir. Pahunongon siya niini sa sugod pa lang.

⁸⁹ Himatikdi, ang usa ka lalaki nga motan-aw sa matahum nga mapulang ngabil sa babaye ug pinintalang nawong, ug mga short ug—ug mga bikini, ug unsa pa man nga aduna kini; ang usa ka tinuod gayud nga lalaking nagahunahuna dili motan-aw sa maong babaye. Karon, ang lalaki nga miyembro ra sa iglesia motan-aw gayud kaniya, mangibog pa kaniya. Apan bisan kung unsa pa siya ka maayo kon tan-awon sa mata, ilingiw gayud sa usa ka lalaking nagahunahuna ang iyang ulo. Ngano man? Miagi na siya sa Salaan sa Dios, ug nasayod siya nga kung motan-aw siya sa maong babaye pagpanapaw na kini diha sa iyang kasingkasing. Wala niya ginahunahuna nga matahum ang maong babaye.

Moingon, "Dili ba nga pagkatahum niyang babaye!"

Dili ingon-ana kini para kaniya. Usa siya ka mahilas kon tan-awon, makaloolooy'ng alaut nga Jezabel, para sa usa ka lalaking nagahunahuna. Ang usa ka anak nga lalaki sa Dios motan-aw kaniya nga naulawan nga siya nahisakup sa pamilya kon diin nahisakup usab kini nga babaye. Husto kana. "Unsaon

man pagkahimo nga igsoong babaye ko kana ug manglihok nga sama niana?”

⁹⁰ Kita n’yo, miagi ang maong babaye diha sa usa ka salaan, ug miagi usab ang maong lalaki diha sa lain. Dili niya hunahunaon nga matahum ang maong babaye, dili gayud. Dili kana katahum para sa usa ka tinuod nga lalaki sa Dios.

⁹¹ Hinumdumi, usa ka higayon niadto sa wala pa ang Dugo ni Jesus Cristo nahimo nga mao ang Salaan, sa diha nga sa pipila ka minuto atong pagahisgotan. “Ang mga anak nga lalaki sa Dios sa nakita ang mga anak nga babaye sa tawo, nga sila’y maanyag, ila silang gipangasawa.” Wala gayud kadto gipasaylo sa Dios. Nahitabo kadto pag-usab, sa pagpaingon sa Israel didto, ug wala gayud sila gipasaylo sa Dios. Ang matag usa kanila nangamatay.

Salaan sa usa ka tawong nagahunahuna!

Pagkagawas ko dinhi gikan sa tigum; adunay usa ka ricky nga nagatindog dinha dapit sa likod sa simbahan usa ka gabii, ang miingon kanako, mga tulo o upat na ka tuig ang milabay, miingon, “Ang hinungdan nga gisulti mo kadto, usa man ikaw ka tigulang na nga tawo.” Miingon, “Sa tan-aw ko maayo man sila kon tan-awon.”

Ingon ko, “Mahunahuna ko kana.” Sa hitsura niya pa lang, masulti mo na kung daw sa unsa siya kaniadto. Ingon ko, “Sultihan ta ka og usa ka butang. Pila na ba ang imong edad?”

“Mga traynta na ka tuig.”

⁹² Ingon ko, “Sa diha nga kinse ka tuig ako nga mas batan-on kay kanimo kaniadto, naghunahuna na ako og mao ra sa gihapon ingon sa karon.” Husto. Ug kahilasan kini sa gihapon!

⁹³ Salaan sa usa ka tawong nagahunahuna! Karon himatikdi, kung dugay na siyang, nasala na ang iyang hunahuna diha sa Pulong sa Dios, nga Salaan sa Dios, dili siya motan-aw sa maong babaye. Dili niya hunahunaon nga matahum kini; hunahunaon niya nga usa kini ka Jezabel. Hunahunaon niya, nga sa luyo nianang mapula nga mga ngabil mao ang makahihilo nga mga tango nga magapaak kaniya. Ug ang Biblia nag-ingon, “Ang mga ganghaan sa maong babaye mao ang mga ganghaan sa impiyerno; ug ang lalaki nga nagalakaw pasulod niini sama gayud sa usa ka baka nga nagapadulong ngadto sa iyang pagkaihaw.” Kana ang Salaan sa usa ka tawong nagahunahuna.

⁹⁴ Unsa man ang inyong gikaibogan? Pagnagalakaw ang babaye diha sa dalan nga nagbisti og ingon niana, ug kamong mga lalaki nagalingi sa inyong ulo, motutok nga sama niana, wala kamo nagagamit sa Salaan sa usa ka tawong nagahunahuna. Tungod, kung ginabuhat ninyo kana, nagapanapaw kamo, kay ang Salaan nag-ingon, “Ang si kinsa man nga nagatan-aw sa babaye nga may pagkaibog kaniya nakapanapaw na uban kaniya.” Ilingiw palayo ang imong ulo,

tawong nagahunahuna. Magpahilayo gikan kaniya. Dili siya matahum. Usa siya ka serpente; husto kana, mokiaykiay nga sama sa serpente, manglihok nga sama sa serpente, mamaak nga sama sa serpente. Pagpahilayo kaniya.

⁹⁵ Oh, oo, ang Pulong sa Dios mao ang Salaan sa usa ka tawong nagahunahuna. Si bisan kinsa man nasayod niana. Dinha ginasala ang inyong kalag, sa Pulong sa Dios. Ug ginapahimo Niini, pagnagaagi kamo sa iya sa Dios nga... Pagnagaagi ang tawong nagahunahuna diha sa Salaan sa Dios, nagahatag kini kaniya og panilaw nga iya sa tawong balaan. Husto kana. Pagnagaagi kamo sa Salaan sa Dios, kung ingon-ana ang inyong panilaw mao'y panilaw na sa usa ka tawong balaan. Nagapahimo kini og panilaw nga iya sa tawo nga matarung. Siguradong okey ra ang maong sinultihan.

⁹⁶ Karon makita nato kung giunsa kini pagbuhat kaniadto diha sa usa ka tipo, didto sa Israel, para lamang sa kongregasyon sa Israel. Kana ang hinungdan, sa pagsulti niini karon, nga kung ang mga ministro aduna may dili nauyonan sa bisan unsa man nga nasulti; para man kini sa akong kongregasyon nga gihatag sa Ginoo kanako aron—aron walihan.

⁹⁷ Himatikdi diha sa Exodo 19, gusto ko nga basahon ninyo kini pagnakapauli na kamo, pagmay dugang na kamo nga panahon. Himatikdi, sa nakasala kaniadto ang Israel, una mikuha sila og usa ka dumalaga nga baka nga mapula nga wala pa sukad nagkaaduna og yugo sa liog niini. Nagapasabot kana nga wala pa gayud kini sukad nagkayugo uban sa bisan unsa man.

⁹⁸ Ug kinahanglan nga pula kini. Ang pula nga kolor maoy usa—usa ka kolor sa pagpasig-uli. Kabalo mo, nasayod ang siyensya nga pagmokuha ka og pula ug motan-aw pinaagi sa pula, ngadto sa pula, puti na kini. Tan-awon mo ang pula, diha sa pula, puti kini. Nagalantaw Siya pinaagi sa pula nga Dugo ni Ginoong Jesus, ug ang atong pula nga mga sala nahimong ingon na ka puti nga sama sa niyebe; pula ngadto sa pula.

Ug ang dumalagang baka ginaihaw sa panahon sa kagabhion, sa tibuok nga kongregasyon sa Israel.

Ug pito ka mga raya sa dugo niini ang ginapahid didto sa pultahan kon diin nga kinahanglan moagi ang tibuok kongregasyon; usa ka tipo sa Pito Ka Mga Kapanahonan Sa Iglesia, pinaagi sa Dugo.

⁹⁹ Ug dayon ginakuha ang iyang lawas ug ginasunog. Ginasunog kini uban sa mga koko niini, uban sa panit, uban sa mga tinae, uban sa mga tai. Ang tanan ginasunog, dungan.

Ug kinahanglan nga kuhaon kini sa usa ka tawong hinlo, ug gikinahanglan nga ibutang didto sa usa ka malimpyo nga lugar nga didto sa gawas sa kongregasyon. Busa, kung makita lang unta sa Israel ang maong pagtipo! Kining Pulong sa Dios kinahanglan nga dili magunitan sa mahugaw'ng mga kamot sa

kawalay-pagtoo. Kinahanglan niini nga usa ka tawong hinlo. Ug kung mahinlo siya, kinahanglan nga moagi siya sa Salaan sa Dios.

Usa ka hinlo nga tawo, hinlo nga mga kamot, ug kinahanglan nga tipigan sulod sa usa ka malimpyo nga lugar; dili sa usa ka lugar kon diin atua nagaambit ang mga Jezabel, ug mga Ricky, ug tanan na; nagaambit sa komunyong ug sa ingon-anang mga butang, sa dihang nakigpuyo-puyo sila sa mga asawa sa uban, ug mga bana sa uban, ug tanan na nga matang sa kahilasan; nagaadto sa mga sayawan ug mga party, ug mugbo'g mga buhok, ug nagasul-ob og mga short, ug tanang uban pa, ug nagatawag sa ilang mga kaugalingon nga mga Cristohanon. Kinahanglan kini nga tipigan sulod sa usa ka malimpyo nga lugar, ug gigunitan sa mahinlo nga mga kamot.

¹⁰⁰ Ug dayon sa diha nga nakasala ang Israel, ug naamgo nga nakahimo sila og sayup, kung ingon-ana ginasabligan sila og mga abo sa niini nga baka, sa ibabaw nila. Ug kadto mao ang tubig sa pagkabinulag, usa ka paghinlo sa sala.

¹⁰¹ Himatikdi. Ania na kini! Ug sa diha nga ang Israel, sa dili pa sila mahimong magpakig-fellowship diha sa pagsimba, gikinahanglan nila una nga moagi sa mga tubig sa pagkabinulag. “Pagpamatarung pinaagi sa pagtoo; nga nagagikan sa pagpatalinghug, sa pagpatalinghug sa Pulong.”

Dayon nagasulod na sila ngadto sa kongregasyon ilalum niadtong pito ka mga raya, sa dugo, sa pagpakita nga adunay usa ka butang nga namatay ug nga nauna na kanila, para sa ilang sala. Gipahimulag sila pinaagi sa pagpatalinghug sa Pulong, ang mga tubig sa pagkabinulag, dayon misulod na ngadto sa pagpakig-fellowship.

¹⁰² Ang bugtong dapit nga gitagbo sa Dios ang tawo maoy sa luyo nianang kahan-ayan. Dili Niya siya pagatagbuon sa bisan asa pa nga ubang dapit. Motagbo ra gayud Siya sa luyo nianang kahan-ayan. Gitagbo sa Dios ang Israel diha sa usa ra ka dapit.

Ug pagatagbuon lang kamo sa Dios sa karong panahon diha sa usa ra ka dapit, ug kana diha kang Jesus Cristo; ug Siya mao ang Pulong, ang mga tubig sa pagkabinulag. Ug ang Iyang Dugo giula alang sa tanang Pito ka mga Kapanahonan sa Iglesia. Ug dayon, pinaagi sa Balaang Espiritu, nagasulod kita ngadto nianang pagpakig-fellowship, nga gikahatag lamang ngadto sa Iglesia. Oh, pagkahalangdon gayud Niya!

¹⁰³ Usab, karon, gusto natong tan-awon diha sa Mga Taga-Efeso 5:26, miingon, “Kini mao ang paghugas sa tubig pinaagi sa Pulong,” mga tubig sa pagkabinulag. Unsa ma’y ginahimo Niini? Kung ingon-ana, ang Salaan sa Dios mao ang Pulong. Mga tubig sa pagkabinulag, “paghugas sa mga tubig, sa pagkabinulag, pinaagi sa Pulong,” ang Salaan sa Dios.

¹⁰⁴ Kung ingon-ana, dili kamo makaduol kang Cristo pinaagi sa salaang sa iglesia. Dili kamo makaduol pinaagi sa usa ka denominasyong salaang o sa usa ka kredong salaang. Adunay usa ra ka Salaang, aron nga makasulod kamo ngadto nianang balaang nga dapit, kana'y pinaagi "sa paghugas sa tubig pinaagi sa Pulong." Ang Pulong sa Dios mao ang Salaang sa tawong nagahunahuna.

¹⁰⁵ Pagahukman ka sa iglesia dinhi kung ikaw ba'y maayo nga miyembro, o dili. Hatagan ka nila ug usa ka maayo nga paglubong, ug ipa-half mast pa ang bandera pagkamatay nimo, magpadala og dagkung ginalda sa mga bulak ug—ug buhaton ang tanan para kanimo. Apan pagmoabot na kini ngadto sa imong kalag sa pag-atubang sa Dios, kinahanglan nga aduna kini og Kinabuhing Walay Katapusan. Ug kung usa kini ka Kinabuhing Walay Katapusan, kabahin kini sa Pulong. Ug sama sa akong pulong nga dili mahimong ilimod . . .

Dili mahimong ilimod sa kaugalingong kong kamot ang akong kamot. Ang kaugalingong kong mga mata dili mahimong ilimod ang akong kamot, o ang akong tiil, o ang akong mga tudlo sa tiil, o unsa man nga bahin kanako. Dili nila mahimong ilimod kini.

Ug dili usab mahimo sa usa ka lalaki nga kabahin sa Pulong sa Dios, o sa usa ka babaye, nga ilimod ang usa ka bahin sa Pulong sa Dios. Kung ingon-ana, mga kababayen-an, pagnagahunahuna kamo nga mahimo kamong magkaaduna og mubo'g buhok ug makaduol sa Presensiya sa Dios, sayup kamo. Nakita ba ninyo kini? Sayup kamo; dili kamo mahimong moagi sa Salaang sa Dios kon diin nga ginahugasan kamo sa tubig sa Pulong. Dinha kamo makasulod ngadto sa pagpakig-fellowship. Abi ninyo nga nakasulod na kamo, apan dili kamo mahimong mosulod hangtud nga nagaagi kamo sa Pulong, ug sa matag gamay nga luna, sa matag gamay nga Pulong sa Dios. "Ang tawo dili mabuhi sa tinapay lamang, kondili sa matag Pulong." Kinahanglan nga moabot kini sa nianang pagsala, nga nagaagi niini. Ug kana ang nagahatag og panilaw nga iya sa tawong matarung, tungod mao kana ang iyang ginapangita, nagapangita siya sa usa ka butang nga mohinlo kaniya.

¹⁰⁶ Ang Pulong, ang Pulong sa Dios mao ang Salaang sa usa ka tawong nagahunahuna, ug nagahatag kini og panilaw nga iya sa tawong matarung. Nahibalo kita nga matuod kana; ginasala pagawas ang tanan nga sala sa dili-pagtoo. Wala na og mga kawalay-pagtoo pagnakaagi ka na sa mao nga Salaang, tungod kay ang panilaw kini sa usa ka matuod nga magtotoo.

¹⁰⁷ Ang matuod nga magtotoo gusto mamahimong husto, bisan unsa pa man. Dili niya gusto nga moingon lang, "Bueno, miyembro ako sa hataas nga mga kapunongan. Miyembro ako sa iglesia, ang pinakadakung iglesia sa siyudad." Dili ko igsapayan kung usa kini ka pang-misyon lamang diha sa suok, kung kini

usa lang ka kamalig nga tigumanan, sa kon asa man, ang tawong nagahunahuna nasayod nga kinahanglan niyang matagbo ang Dios. Ug bisan unsa pa man ang isulti sa iglesia, o isulti ni kinsa man, kinahanglan niyang moduol uyon sa mga kondisyon sa Dios. Ug ang mga kondisyon sa Dios mao ang Pulong sa Dios.

“Bueno,” moingon sila, “Pulong sa Dios.”

Sigurado, tanan sila nagatoo nga Pulong Kini sa Dios, apan mahimo ba ninyong magpasala pinaagi Niini? Unsaon man ninyo pagpaagi Dinha sa usa ka babayeng mubo ang buhok? Unsaon man ninyo pagbuhat niana? Unsaon man ninyo pagpaagi Dinha sa usa ka tawong dili mobarug para niining Doktrina? Kita n’yo?

Dili kini panilaw sa usa ka tawong nagahunahuna. Dili. Ang tawong nagahunahuna magahunahuna, ang tawong nagahunahuna magahunahuna sa duha ka higayon sa dili pa siya molukso ngadto sa usa ka butang nga sama niana.

¹⁰⁸ Himatikdi, dili mahimong ilimod sa Pulong ang Kaugalingon Niini. Dayon nagakatagbaw kini, o nagapangandoy kini. Nagapangandoy kini sa unsa? Unsa man ang nagapapangandoy kanimo Niini, sa una pa lang? Tungod kay diha sa kinasuloran sa imong kalag adunay predestinadong binhi nga mao ang Kinabuhing Walay Katapusan, nga dugay nang anaa dinha, anaa na dinha kaniadto pa. “Ang tanan nga gikahatag Kanako sa Amahan magaduol Kanako. Wala ni kinsa man kanila ang mawala.”

¹⁰⁹ Panilaw sa usa ka tawong nagahunahuna, sa diha nga madungog sa tawong nagahunahuna ang Pulong sa Dios, “Ang Akong mga karnero nagapatalinghug sa Akong Tingog, sa dumuloong dili sila monunot,” kay sa kinasuloran dinha adunay Kinabuhi, ug naga-konekta ang Kinabuhi sa Kinabuhi.

Naga-konekta ang sala sa sala, ug hipokrito kaayo ang sala hangtud nga maghunahuna kini nga luwas kini sa diha nga dili man kini luwas. Anaa kini sa pinakagiladmon nga hipokrisiya.

¹¹⁰ Ang pang-simbahan nga mga miyembro gusto ang salaan nga iya sa denominasyon aron nga makuha nila ang kaugalingon nilang pangandoy ug tawgon sa gihapon nga mga tawong “relihiyoso.” Madungog mo sila nga nagaingon, “Oh, relihiyoso siya kaayo.”

¹¹¹ Sa Africa, usa ka adlaw sa didto ako, ug nagaestoryahay sila kaniadto mahitungod niini, ang uban sa mga bata naghigot-higot mahitungod niining mga kalantahong rock-and-roll nga ginakanta ni Elvis Presley ug nila, ni Pat Boone ug kinsa pa man, ni Ricky Nelson ug tanang uban pa kanila. Ingon ko, “Mga pundok kana sa mga mabudhion.”

Ang uban sa gagmay’ng mga batang babaye miingon, “Aba, relihiyoso baya siya kaayo.”

¹¹² Ingon ko, “Mao man usab si Judas kaniadto.” Ingon ko, “Katloan lang ka buok nga salapi ang nakuha ni Judas kaniadto; si Elvis Presley pipila ka milyon ka mga dolyares ang nakuha.” Kita n’yo? “Pareho nilang gibaligya ang ilang mga pagkapanganay.” Kita n’yo? Ingon ko, “Sila’y ga-...ang pinaka-grabeng pagkautangan nga aduna ang nasud.” Bisan pa man, ingon ka limbongan gayud nga sama sa salaang sa sigarilyo, kini nga mga denominasyon ginatugotan kadto nga mga miyembro. Dili gani angay nga sila’y. . . Kinahanglan nga aduna unta og usa ka balaod nga dili sila mahitugotan nga magkanta og relihiyosong mga kanta. Batok kini. . . angay unta nga batok sa balaod para kanila nga buhaton kini.

Apan ang maong tibuok butang nahimo nang usa ka dakung tipun-og sa hipokrisiya, ug dinha sila nagapabilin sa karon. Ang matuod nga Sal- . . . [Blangko nga bahin sa teyp—Ed.] para sa kalag, nagaingon, “Kung nahigugma ka sa kalibutan o sa mga butang nga iya sa kalibutan, ang gugma sa Dios wala kanimo.”

¹¹³ Kita n’yo, dili mo mahimong—dili mo mahimong ingnon nga ang rock-and-roll iya sa kalibutan. . . o iya sa Dios. Ang rock-and-roll iya sa kalibutan. Ang bisan unsa man nianang mga sayaw-sayaw ug nga gisala. . . mahugaw og mahilas nga mga butang, diay, iya sa kalibutan. Iya kini tanan sa kalibutan.

Dili mo mahimong ingnon nga ang pinutlan nga buhok sa usa ka babaye iya sa Dios. Nagaingon ang Biblia nga dili ingon niana, busa kahugawan kini nga iya sa kalibutan. Ug kung nahigugma ka sa kalibutan bisan og gamay, ang gugma sa Dios wala man lang kanimo. Kita n’yo?

¹¹⁴ Unsa man kana? Bueno, unsa man ang nagabira niini? Usa ka butang dinha sa kinasuloran ang maoy nagabira. Ang kalag mao ang nagabira sa imong mga kahinguhaan gikan sa gawas, pasulod sa espiritu, ngadto sa kalag. Ug kung ang kalag nahigugma sa kalibutan, patay kini. Dili ko igsapayan kung unsa pa kini ka dinihogan, importante ang ania *dinhi*, ug kung unsa ka matarung ang ania *dinhi*; kung *dinhi* lang nga dapit patay kini. “Kay siya nga nahigugma sa kalibutan o sa mga butang nga iya sa kalibutan, ang gugma sa Dios wala man lang diha kaniya,” bisan unsa pa ka relihiyoso.

¹¹⁵ Ang matuod nga Salaan, sa nianang paagi, maga—magapagawas sa tanan nianang mga butang ug walay laing ihatud kondili ang pagkamatuod lamang sa Dios, ang Pulong, pasulod ngadto sa tinuod gayud nga kalag.

¹¹⁶ Sama sila kang Esau, okey sa panggawas. Relihiyoso si Esau sa panggawas. Ug kung paghisgotan na ang relihiyon, daw sa mas relihiyoso pa kay sa kung unsa si Jacob kaniadto. Daw sa mas maayo pa siya nga tawo kay sa kung unsa kaniadto si Jacob, apan ang kinasuloran niya, kung unsa gayud siya. Relihiyoso siya sa panggawas, apan ang iyang mga

panghunahuna dili sinala. Wala siya naghunahuna og husto mahitungod sa pagkapanganay. Siya—wala niya gihunahuna nga ang Dios, nga ang pagkapanganay nagkahulogan og sama gayud sa giingon sa Dios nga kahulogan niini. Atua siya, nga miingon, “Gutom na ako, unsa ma’y kamahinungdanon ang mahimo sa niining karaan na nga pagkapanganay? Imo na kini kung gusto mo kini.” Oh, sus! Kita n’yo?

“Nagasimba ako; pareho ra ako ka buutan nimo. Ang akong denominasyon ingon ka pareho ra. . .Aba, usa kini sa mga pinakadaku sa kalibutan. Ang akong inahan miyembro niini. Ang akong amahan miyembro niini. Ang tanan *niini, niana*, ug *uban pa*. Edukado ang akong pastor; aduna siya og *ingon-niini ug ingon-niana*.” Samot pa kana nga nagapahilayo kaniya gikan sa Dios. Dili ingon niana ang salaan sa usa ka tawong nagahunahuna.

Kung ingon niana pa kini, giunsa man ni Pedro pagkahimo sa kung unsa siya kaniadto, nga dili man gani siya makahimo sa pagsulat sa iyang ngalan mismo? Apan dala niya kaniadto ang Salaan sa usa ka tawong nagahunahuna. Himatikdi. Oh, sus!

¹¹⁷ Abi ni Esau nga kadto nga pagkapanganay wala nagkahulogan og sama gayud sa giingon sa Dios nga kahulogan niini. Mao kadto ang kalainan tali sa Kinabuhi ug kamatayon. Ug busa, sama kang Eva ug sama kang Judas, gipangbaligya ang ilang pagkapanganay para sa katagbawan sa kalami sa kahibalo nga iya sa sibilisasyon. Eksaktong para niana kon nganong gibaligya ni Eva ang iyang pagkapanganay. Gibaligya niya kini para sa usa ka gamay’ng panilaw sa siyensya, usa ka gamay’ng panilaw para sa kalibutanong kahibalo, usa ka medyo mas maayo nga iglesia, usa ka medyo mas hataas nga matang sa mga tawo, kon tawagon sa karong panahon. Kita n’yo?

Ug gibaligya ni Judas ang iyang pagkapanganay para sa katloan ka buok nga salapi, ug aron makapanguwarta og pipila ka dugang nga mga dolyares. “Ang akong kongregasyon dinhi makabayad kanako og mas maayo, ug dinhi na lang ako mowali.” Kita n’yo? “Busa, kung ako mahimong usa ka magwawali, bueno. . .”

¹¹⁸ Miingon sila, “Igsoong Branham, nagatoo kami nga ang Mensahe mao ang Kamatuoran, apan dili namo mahimong dawaton Kini. Kung dawaton namo, aba, asa na man kami mowali?” Huh! Sa kalibutan, igsoon, mao kana ang parokya. Mao gayud. “Bueno, wala na sa mga kaigsoonan ang magasuporta kanako.” Ako—wala ako nagapaabot nga pagasuportahan ni sa usa sa mga kaigsoonan. Nagapaabot ako kang Jesus nga magasuporta kanako, tungod kay ginabarugan Niya Kini. Siya Ang Maoy nagsulti Niini.

¹¹⁹ Ug sa diha nga ang matuod nga pagkapanganay, ang Dugo, gisala pinaagi sa Pulong; ug ang tanang kasal-anan, ug

ang kalibutan, ug ang iglesia, ug mga denominasyon, ug ang sektarianismo, nga gibilin na didto sa gawas. Ang edukasyon, sibilisasyon, iglesia, denominasyon, sistema, ang tanan na nga matang sa kasal-anan gibilin na didto sa gawas sa diha nga ang tawong nagahunahuna ginadawat na ang Salaan nga iya sa tawong nagahunahuna, ang hunahuna nga iya sa Dios.

¹²⁰ Wala na og bisan unsa man nga nahibilin niini sa diha nga ginakinabuhi na sa usa ka tawo ang iyang—iyang kinabuhi pinaagi sa Salaan sa Dios; himatikdi, ang inyong kinabuhi dinhi nalanggikit og ayo sa kasal-anan, tungod kay kamo “nangatawo diha sa kasal-anan, naporma diha sa kadautan, miabot sa kalibutan nga nagapamakak na.”

Gusto kong magsulti og usa ka butang, sama sa daan nang ginasulti ni Igsoong McCullough. Paminaw kanako.

¹²¹ Sa dihang miabot kamo sa kalibutan, natawo kamo diha sa kasal-anan. Wala kamo mianhi nga aduna man lang og kahigayonan nga molampos. Kamo’y “natawo sa kasal-anan, naporma diha sa kadautan, miabot sa kalibutan nga nagapamakak na,” aduna na diha sulod sa kaugalingon ninyong espiritu, ang pangibog sa kasal-anan, usa ka nagahigugma sa kasal-anan tungod kay natawo kamo sa kasal-anan. Wala kamo’y dag-anan.

Apan diha sa kinasuloran mo, sa kon asa man, ania ka, nga aduna sa kung unsang butang sa sulod dinha nga nagasugod pagbira. Kung nahibalo ka, usa kadto ka butang nga nagasulti kanimo nga aduna gyu’y Dios sa kon asa man; ug nabasa nimo ang Iyang Pulong. Dayon misimba ka, gidawat nimo ang ilang mga ideya sa nasultihan ka sa mas maayo, dayon wala ka na nagagamit og Salaan nga iya sa usa ka tawong nagahunahuna. Apan sa diha nga nagagamit ka og Salaan nga iya sa Dios, nga maoy Salaan sa usa ka tawong nagahunahuna, tungod kay, “Ang tanang uban pa nga mga salaan mangahanaw, apan sa Akoa dili.” Ug sa diha nga imong ginadawat ang Salaan sa Dios ug ginasala ang imong kinabuhi, ang imong mga tinguha; kung imong ginasala ang imong mga tinguha sa Salaan sa Dios, sa Salaan sa usa ka tawong nagahunahuna, wala na’y mahibilin pa gawas sa Espiritu Santo.

¹²² Karon, kung gusto ninyo og ebidensiya sa Espiritu Santo, mao na kana. Sa diha nga ang imong kalag magalinya sa Pulong sa Dios, sa tanang butang, nagapakita kini nga imo nang gisala ang imong kinabuhi pinaagi sa Salaan sa tawong nagahunahuna, sa Salaan nga iya sa Dios.

¹²³ Himatikdi, mao ba kana ang Salaan sa Dios? Miingon Siya, “Gihugasan kita pinaagi sa tubig sa Pulong.”

Ug sa diha nga naghatag ang Dios og usa ka Salaan kang Adan ug kang Eva, didto sa tanaman sa Eden, miingon Siya, “Ayaw gayud kamo pagkuha ni usa *niini* dinha.” Apan

gibuslotan Kini ni Satanas, miingon, “Oh, gamay ra kini, dili kini makapadaut.” Usa ra gayud ka tulo, pagkahuman, mao lang kadto ang gikinahanglan aron madala ang tawo ngadto sa kamatayan.

¹²⁴ Mao ra gayud kadto ang gikinahanglan, usa ra ka tilaw og nicotine, dayon wala na sila.

¹²⁵ Wala na gyu’y nahibilin gawas sa Espiritu Santo.

¹²⁶ Ug dayon nagapakita kana nga sa sulod ninyo mao kanang predestinadong binhi sa kinasuloran ninyo, nga maoy nagapauhaw kaninyo sa Dios. “Ang tanan nga gikahatag Kanako sa Amahan, nga gihatag Kanako aron tuboson; namatay sila uban Kanako didto sa Kalbaryo; nabanhaw sila uban Kanako niadtong pagkabanhaw; ang tanan nga gikahatag Niya Kanako, magaduol Kanako. Igapahimutang sila diha sa Lawas, kon diin ingon nga tiil, bukton, ilong, baba, unsa man kini; igapahimutang sila Dinha. Ug magaduol sila Kanako diha sa ilang mga kapanahonan.” Oh, sus!

¹²⁷ Dinha ang tinuod nga pagsala sa tanang kasal-anan sa kalibutan, ug patay na ang maong paghigugma sa kalibutan, ug kini nga kalag nagabira og usa lamang ka butang. Ania kini, ayaw’g. . . Hinumdumi! Ayaw kini kalimti. Tanan kamo dinha sa mga telepono, ipatuhop kini dinha sa inyong hunahuna. Sa diha nga ang usa ka tawong nagahunahuna nagasugod paghunahuna sa kung Kinsa siya magaatubang, ug kung unsa gayud ang Pulong sa Dios; sa diha nga nagasugod siya sa paghunahuna, kung ingon-ana pagnagabira siya pinaagi Niana, wala na og bisan unsa pa nga moabot niini gawas sa Espiritu Santo.

Unsa man kini? Ang semilya kini, ang binhi nga Pulong sugod pa sa kinasugdanan, nga kamo atua na sa Dios sa sugod pa lang, nga ania karon ginabira ang mao nga binhi sa Kinabuhi. Anaa sulod sa inyong kasingkasing ang maong binhi, tungod sa pagtagana nang daan. Alleluyah! Anaa na daan dinha ang binhi, tungod sa paghibalo nang daan sa Dios, nga gipili nang daan. Ug sa diha nga nagabira kini, dili kini makapangbira sa laing uban pa gawas sa Pulong.

Ug kung ingon-ana panilaw na kini sa tawong nagahunahuna, sa tawong matarung, sa tawong balaan nga ginatan-aw ang Biblia, nga si Jesus Cristo mao sa gihapon kagahapon ug hangtud sa kahangturan. Unsa na man ang nagaabot sa kinasuloran nga luna dinha? Kanang Pulong, nga anaa na sulod sa kasingkasing. “Sa akong kasingkasing ginatipigan ko ang Imong Pulong, aron dili ako makasala batok Kanimo.”

Unsa man kini, pag-ginasala kini pinaagi sa Pulong? Adunay usa lang ka butang ang makalusot sa Pulong; kana mao ang Espiritu Santo. Kana lang ang bugtong butang nga makalusot sa Pulong, mao ang Espiritu Santo. Ug ang Salaan nga iya sa

tawong nagahunahuna maoy nagahatag og panilaw nga iya sa tawong balaan.

¹²⁸ Kung ingon-ana, natilawan niya ang Langitnong mga butang, anaa na ang Pulong sa Dios sulod sa iyang kasingkasing. Makita niya Kining nahipadayag sa atubangan niya, ug ang tibuok niyang kalag naputos Niini, ug ang kalibutan ug ang tanang butang sa palibot niya patay na.

¹²⁹ Salaan sa usa ka tawong nagahunahuna, nga iya sa relihiyon; ug ginahunahuna ko karon ang pagsala sa relihiyon. Sa diha nga ang Salaan nga iya sa tawong nagahunahuna nagahatag og panilaw sa tawong balaan, kita n'yo, ginatagbaw Niini ang iyang panilaw. Makita niya nga si Jesus Cristo mao sa gihapon kagahapon, karon, ug hangtud sa kahangturan. Mao na kini. Makita Siya mismo sa atubangan kanato, nga ginabuhat ang mao rang mga butang nga Iyang gihimo kaniadto; ginapatagbaw niini ang panilaw sa maong tawong balaan, ang iyang hunahuna.

¹³⁰ Nahibaloan niya dayon nga siya milabang na gikan sa kamatayon paingon sa Kinabuhi. Ug nagahigugma siya, ug—ug—ug ang mga paghigugma niini sa kalibutan. . . sa pagpamatuod, ug gustong mapamatud-an ug mapanghimatud-an ang Pulong. Diha sa matag kapanahonan nagahulat siya Niini, tungod kay usa siya ka tawong balaan ug aduna siya'y tinguha nga makita ang Dios. Ang uban gusto lang magpamiyembro sa iglesia. Kini nga tawo gusto nga makita ang Dios. Dili niya Siya makita diha sa usa ka pundok sa mga kredo. Dili niya Siya makita diha sa dagku og maayong mga pipe organ, o mga katedral, ug sa tag-as nga mga krus, o sa hinashasan nga mga iskolar nga nakabali ang mga kuwelyo niini. Dili niya Siya makita diha sa teolohiya ug sa mga teologo. Makita niya Siya diha sa mga pagpanghimatuod sa Iyang Pulong.

Nakita ko Siya diha sa mga daub Niini nga pangbantay.

Nakita sa mga mata ko ang himaya sa pag-abot sa Ginoo;

Iyang ginapigsat ang mga naani na kon diin didto gitago ang mga parras sa kapungot;

Iyang gibuhian ang makalilisang nga kilat uban sa Iyang nagahaguros nga espada;

Ang Iyang Kamatuoran padayon gayud nga nagamartsa. (Mamaingon Niini, hangtud sa katapusan. Oo, sir.)

¹³¹ Nakita n'yo unsay akong pasabot? Usa ka Salaan, ang tawong. . . O, Salaan sa usa ka tawong nagahunahuna; usa ka tawo nga gustong motindog diha sa Presensiya sa Dios. Unsa man ang Salaan sa Dios? Ang Iyang Pulong. “Sa adlaw nga kamo mokaon niini, kana nga adlaw kamo mamatay.” Dili

ko igsapayan kung unsa man ang nagakahitabo dinhi; ayaw gayud labyi kana nga Pulong. “Gihugasan na pinaagi sa mga tubig sa Pulong,” sa Salaan sa tawong nagahunahuna. Dili sa usa ka denominasyon, dili sa usa ka kredo, dili sa usa ka iglesia, dili sa usa ka katedral; kondili sa usa ka Salaan sa tawong nagahunahuna, kay pagahukman kamo pinaagi sa Pulong. Pagahunahunaon kana sa usa ka tawong nagahunahuna. Ang tawong buangbuang, o ang panilaw nga iya sa kalibutan, modawat og bisan unsa na lang, usa ka puli. Nganong puli man sa dihang aduna ma’y Usa ka tinuod?

¹³² Hunahunaa, hunahunaa lang ninyo kini sa makadiyut. Usa ka babayeng nagapanulti sa laing mga dila, nga mubo ang buhok ug naka-lipstick, ug dayon padayon lang sa gihapon ang iglesia niini, nga kana mao kono ang ebidensiya sa Espiritu Santo.

¹³³ O usa ka magwawali nga gikan sa usa ka seminaryo o sa kung unsa nga Bible school, nga nagagamit og bautismo nga iya sa trinitarian, o nagapakig-kompromiso sa Pulong, ngadto sa kung unsa nga kredo o denominasyon. Mao ba kana ang Salaan sa usa ka tawong nagahunahuna? Dili sa paagi nga pagtan-aw ko niini, igsoon. Usa ka tawong buangbuang ang nagaagi dinha. Husto kana. Mahunahuna ba ninyo kana? Imbis nga gamiton ang Pulong sa Dios ingon nga Salaan para sa iyang kalag; ginatugotan ang maong mga kredo ug denominasyon nga mangatipun-og sa ibabaw niya nga sama niana, imbis nga dawaton ang Pulong sa Dios ingon nga usa ka Salaan. Ug dayon bug-os na siyang nakontaminado, ug ginatugotan niya na sila nga ipasulod ngadto kaniya ang mga doktrina nga iya sa tawo, sa pagbuhat sa mga butang, “nga halos limbongan na ang mismong mga Pinili,” ug ginasalikway ang Pulong.

Sa dihang, mahimo siyang modangup sa kaugalingon niyang kalag, kung aduna man dinha og madangpan. Apan kung kanang predestinadong binhi. . . Ayaw ninyo kini sipyata. Kung kanang predestinadong binhi wala sa sulod dinha, wala kini madangpan Dinha, tungod kay mangdangop kini para sa mga pangibog niini.

¹³⁴ Kung ang usa ka tawong nagapanigarilyo gusto og panilaw nga iya sa tawong nagapanigarilyo, ug kung nagagunit siya og usa ka tukog. . . Moingon ko, “Supsupa ang imong tudlo,” ug motindog siya didto nga ginasupsup ang iyang tudlo. [Ginasupsup ni Igsoong Branham ang iyang tudlo, sa paghulagway—Ed.]

¹³⁵ Aba, moingon siya, “Binuang kana.” Ngano man? Ang panilaw niya para man sa nicotine. Busa, dili siya og usa ka tawong nagahunahuna. Kita n’yo? Apan moingon ka, “Bueno, wala ko, wala ko’y matagamtaman og bisan unsa man. Gusto kong matagamtaman ang. . .Gusto kong matagamtaman ang tabako. Wala ko ni usa ka butang nga matagamtaman.”

¹³⁶ Hatagi siya og usa ka kimpit sa sinina ug ipasupsup kana kaniya. Kita n'yo? Oo, ipasupsup kana kaniya. Moingon siya, "Wala ko'y natagamtaman og bisan unsa." Para man diay sa unsa mo kini ginasupsup, kung ingon-ana? Aduna ka'y pangandoy nga matagamtaman ang nicotine.

Ug sa diha nga nagasupsup kamo diha usa ka kredo sa iglesia, ug padayon nga mugbo ang buhok kamong mga babaye, pinintalan ang mga nawong, ug mahilas ang pagpamisti; ug kamong mga kalalaken-an nagatan-aw kanila, ug sa tanan na niining uban pa nga mga butang, ug nagapanglihok sama sa inyong pagpanglihok. Unsa man kini? Unsa man ang anaa sa sulod dinha? Anaa pa dinha sa sulod ang pagka-kalibutanon, ug aduna ka'y panilaw. Nagasupsup ka niini tungod sa usa ka panilaw.

¹³⁷ "Nagasimba ako sa *niining* iglesia; wala gayud nila gihisgotan kana nga butang. Wala sila'y ginasulti og bisan unsa man bahin *niini*, wala gayud bahin *niana*. Wala ni usa sa niining mga butang ang nahisgotan. Mas masangkad og hunahuna ang among magwawali kay *niana*. Wala kami nagasulti og mga butang nga sama *niana*." Unsa kini? Aduna kamoy panilaw nga iya sa kalibutan nga inyong ginasupsup. Husto!

¹³⁸ Apan ang usa ka babayeng nagahunahuna dili modawat og ingon nianang matang nga butang. Nasayod siya nga kinahanglan nga balaan gayud siya. Ug ang butang lamang nga mapalusot mo sa Pulong sa Dios mao ang Espiritu, ang Gahum nga nagahatag og kinabuhi aron himoon ang Pulong Mismo, nga anaa diha kaninyo, nga buhi aron ipadayag si Jesus Cristo diha sa kapanahonan nga inyong gikapuy-an. Alleluyah! Igsoon, kung dili kana mao ang Kamatuoran, wala ko kabalo kung unsa na ang Kamatuoran. Nawala na ako sa akong pangutok kung dili kana mao ang Kamatuoran.

¹³⁹ Kini mao ang Pulong Mismo diha sa inyong kasingkasing, nga predestinado dinha, nga maoy nagabira. Ug ginaluwa niini pagawas kanang kalibutan; ayaw niini kini. Apan sa dihang nagaabot kini dinhi sa Pulong, nagasugod kini pagpangganoy. Ug sa diha nga nagaganoy kini pinaagi sa Pulong, dili kini mahimo og uban pa kondili ang Espiritu Santo aron nga maghatag og kinabuhi sa nianang Pulong.

¹⁴⁰ Kung ingon-ana ang usa ka nagahunahuna, relihiyosong tawo ang iyang Salaan mao ang Pulong, ug ginapatagbaw niini kanang balaan nga panilaw nga anaa sa iyang kasingkasing; salaan sa usa ka tawong nagahunahuna, panilaw sa usa ka tawong balaan. Oh, sus, kung unsa gayud ang anaa sa atubangan kanato!

¹⁴¹ Imbis nga gamiton ang Salaan sa Dios para sa iyang kalag, gitugotan niya si Satanas nga limbongan siya pinaagi sa kung unsa nga denominasyon o kredo, sama gayud sa paglimbong

sa mga kompaniya sa sigarilyo kaninyong mga tawo nga nagapanigarilyo. Magpadaghan lang kamo og mga miyembro, ug kana lang.

Oh, tugoting humanon ko na kini sa pipila na lang ka minuto, sa pagsulti niini.

¹⁴² Buta nga Laodicea! Daw sa unsa ka mahimo kitang buta! Buta nga Laodicea, ang pagpanguna sa buta sa niining kapanahonan, ilalum sa dili-mao nga mga pagpaaron-aron, ilalum sa bakak nga mga kredo, ilalum sa mga dogma nga bakak, ilalum sa denominasyon nga bakak, ilalum sa pang-kredong mga libro nga bakak. Oh, buta nga Laodicea, nga nagaguyod sa mga buta, pareho kamong tanan paingon sa gahong!

¹⁴³ Pulihi ang imong salaan karong gabhiona, magwawali. Ayaw biraha kanang denominasyonhong nicotine pasulod sa imong sistema, nga mga dogma ug mga kredo, nga miingon si Jesus, “Ang kinsa man nga magadugang og usa ka pulong ngadto Niini, o magataktak og usa ka pulong gikan Niini.” Sa diha nga ginasultihan mo ang imong kongregasyon nga husto lang kini para kanilang mga kababayan-an nga buhaton *kana*, og sa mga kalalaken-an nga buhaton *kana*, ug tanan na niining mga butanga, *kana* ug ang *uban pa*; basta nga nagapabilin lang sila nga matinuuron sa *niini* ug ginabuhat *kana*, ug ginatuman kining mga kredo ug ingon-anang mga butang, wala ka ba naulaw sa imong kaugalingon?

“Buta nga mga Fariseo,” ang ingon ni Jesus.

¹⁴⁴ Ug sa diha nga si Jesus misinggit, “Buta nga mga Fariseo,” ang Balaang Espiritu sulod sa kaugalingong kong kasingkasing nagasinggit, “Buta nga Laodicea! Makadaghang higayon kamo unta nga hatagan sa Dios og usa ka rebaybal! Apan miabot na karon ang inyong oras; ulahi na kini kaayo karon. Kung daw sa unsa ninyong gikataw-an ug gibiyaybiayan ang mga tawo nga gipadala sa Dios kaninyo! Apan karon miabot na ang inyong oras. Oh, Estados Unidos, Estados Unidos, daw sa unsa unta nga lumluman kamo sa Dios maingon sa usa—usa ka himongaan nga ginalumluman ang mga anak niini, apan ayaw ninyo.” Karon kini nga Tingog nagakaylap gikan sa mga baybayon ngadto sa mga baybayon, gikan sa amihanan ngadto sa habagatan, ug sa sidlakan ngadto kasadpan. Daw sa unsa nga lumluman kamo unta sa Dios, apan nagdumili kamo! Karon miabot na ang inyong oras.

¹⁴⁵ Mga nasud nangabungkag. Nagakalumpag na ang kalibutan. Kinse ka gatus ka milya ka tapyas niini, tulo o upat ka gatus ka milya ang kalaparon, ang maunlod, ginatus ka . . . o tingali kuwarenta ka milya paunlod ngadto nianang dakung gahong didto, usa sa niining mga adlaw, ug mosulod ang mga balod paingon ngadto sa estado sa Kentucky. Ug pagmahitabo kini,

pagatay-ogon niini kaayo ang kalibutan nga ang tanan sa ibabaw niini mangalumpag.

¹⁴⁶ Oh, itago ako sulod sa maong Bato sa mga kapanahonan! Dios, tugoti ako, tugoti ako. Ginhawai ako, Ginoo. Espiritu sa buhing Dios, ginhawai ako. Tugoti akong gamiton ang Salaan sa Dios ug magkinabuhi ilalum Niana, Ginoo. Tugoti akong mohanggap og lab-as nga hangin nga iya sa Espiritu Santo pasulod sa akong mga baga, sa akong kalag matag adlaw, aron dili ako makasala batok Kanimo, Oh Ginoo. Ginhawai ako, Balaang Espiritu, ginhawai ako! Akong. . .

¹⁴⁷ Tugoti ako nga maitanum ang Pulong sa Dios sulod sa akong kasingkasing, ug tinguhaon dinha nga dili ako mosimang ngadto sa tuo o sa wala, nga papalayo Niini, apan magkinabuhi ako nga matinuuron Niini sa tanang mga adlaw sa akong kinabuhi. Oh Amahang Dios, kung ingon-ana ipadala kanako ang Balaang Espiritu sa Kinabuhi, aron himoon nga buhi kanako kana nga mga Pulong, aron nga maipahayag ko si Jesus Cristo atubangan sa niadtong mga anaa sa atubangan ko, nagasalig ako nga matuman kini. Mao kana ang akong ginaampo.

¹⁴⁸ Oh, sus! Himatikdi kung unsa na sila karon diha nianang mga kaiglesiahan. Ginasuyop ang mga tawo agi nianang denominasyong mga salaan, ngadto sa ekuminikanhong konseho. Ngano? Ngano man? Kay ginahatag niini kanila ang pangibog diha sa ilang kasingkasing, organisasyon. Aduna sila'y panilaw para sa organisasyon. Pagabuhaton nila kini.

¹⁴⁹ Sa matag higayon nga ang Dios mipadala kanila og rebaybal, ug, sila, unsa ma'y ilang ginabuhat? Ila kining ginahimo nga organisasyon. Husto ba kana? Busa aduna sila og ilang matang nga salaan, tungod kay aduna man sila'y dakung panilaw. Ug karon igahatag sa Dios kanila ang pangibog sa ilang panilaw. Igahatag Niya kanila. . . Ginasuyop nila sila pasulod diretso sa ekuminikanhong konseho, ug dayon maangkon na nila ang ilang panilaw para sa organisasyon kung ingon-ana. Paingon na sila ngadto niini.

¹⁵⁰ Oh, iglesia sa Laodicea, ayaw pagpalimbong sa niining kapanahonan, pinaagi sa ilang mga pagpanglimbong. Oh, Pentecost, kamo nga mipaingon na ngadto sa Laodicea, kamo nga kabahin na sa Laodicea, ang iglesiang patay; tanan na sa Methodist, Baptist, ug Presbyterian, usa na lang ka pormang pang-seremonya. Apan kamong mga Pentecostal nga usahay makasulti pa sa gihapon og "amen"; nga makahimo sa pagtugtog og daghang mga alawiton ibabaw sa entablado, ug adunay mugbo'g buhok nga mga kababayan-an nga mangsayaw sa maong tibuok lugar, ug nagatoo sa gihapon sa Balaanong pagpang-ayo; pila na ka higayon unta nga pagalumlan kamo sa Dios, apan midawat kamo og laing salaan, usa

ka denominasyonhong salaan. Pila ka higayon na unta nga pagalumluan kamo sa Dios!

¹⁵¹ Daw sa unsa kini ka malimbongon gayud! Mateo 24:24, nag-
ingon si Jesus nga ang . . . “Pagalimbongan niini ang mismong
mga Pinili kon mahimo pa.” Daw sa unsa gayud kamo ka haduol,
sama ni Eva, nga biyaan lang ang usa o duha ka gagmay’ng
mga butang nga dili ninyo madawat, tungod kay nahimo na
kamong organisasyon ug dili na makadawat Niini. Kana lang
ang gikinahanglan. Mas maayo pa nga dawaton mo na ang
maong tibuok butang, “Kay ang malapas mo lang ang pinaka-
gamay, gilapas mo na ang tanan.” Oh!

¹⁵² Pentecost, Pentecost, iagi ang inyong panghunahuna diha sa
Salaan nga iya sa Dios, dili sa inyong denominasyonhong mga
damgo, ug magagawas kamo nga may panilaw na nga iya sa
tawong balaan, ang matuod nga bautismo sa Balaang Espiritu.

¹⁵³ Mahimo ba ninyong hunahunaon ang usa ka lalaki nga
ginatugotan ang iyang asawa nga putlon ang buhok niini,
magsul-ob og mga short, o magsul-ob og karsones, ug
moingon nga gikan siya sa Salaan sa tawong nagahunahuna?
Mahunahuna ba ninyo ang usa ka lalaki nga ginahimo ang
butang nga sama niana?

¹⁵⁴ Mahunahuna ba ninyo ang usa ka magwawali nga
nagatindog diha sa pulpito, tungod kay maayo ang pagkasuhol
kaniya sa kongregasyon nga ginapikipik siya sa likod, ginatawag
siyang, “Doktor, Igsoon, Reverend,” ug ginadala siya ngadto sa
tanang na nga matang sa mga pag-party-party kon diin sagol-
sagol sila sa pagpangaligo, ug tanan nang uban pa, didto
sa mga baybayon; mahunahuna ba ninyo ang maong tawo
nga nagaangkon nga siya kono nagaagi sa Salaan sa tawong
nagahunahuna?

¹⁵⁵ Ug ang uban niadtong mga kababayan-an diha sa entablado,
ang gitag-on sa ilang mga sinina ibabaw sa ilang mga tuhod, ug
huot kaayo ang pagkatahi ug ginapakita na ang matag kurba,
sa matag lihok nila, ug makita ang pang-ilalum nila nga mga
sapat tungod sa ilang mga bisti; pareho lang ka dautan sama
sa pagsul-ob og mga short, mga bikini, o unsang uban pa.
Kamong mga Pentecostal, buta, Laodiceang mga magwawali,
hangtud kanus-a kaha ang Dios mag-antus kaninyo, wala
ko kabalo. Mahimong . . . Malooy unta ang Dios sa inyong—
inyong mga mata nga buta. Aduna Siya’y panambal sa mata
karong gabhiona, aron buksan ang inyong mga mata, aron nga
makakita kamo.

¹⁵⁶ Sama sa gisulti ko kaganinang buntag, ania na kita sa
kapanahonan sa igtatan-aw, sa pinaka-hataas. Wala na’y mga
galamhan sa ibabaw niana, nga mapalihok ninyo sa panggawas,
aron sa pag-ila. Kamo, gikan sa inyong ilong, makapanimaho
kamo; gikan sa inyong mga ngabil, makapagsulti kamo; sa

inyong mga kamot, makahikap kamo ug makatunol; ug ang inyong mga tiil, ug uban pa; apan dili na kamo mahimong molampas pa sa inyong mga mata.

¹⁵⁷ Miabot na si Malaquias 4; igtatan-aw! “Ug sa panahon sa kagabhion motungha ang Kahayag.” Oh, pagpanglakaw kamo diha sa maong Kahayag!

Manglakaw kita diha sa Kahayag, usa ka
matahum nga Kahayag,
Nga nagaabot kon diin madan-ag ang mga
yamog sa kalooy;
Sidlaki ang palibot ko sa adlaw ug gabii,
Jesus, ang Pulong, ang Kahayag sa kalibutan.

¹⁵⁸ Oo, sir. Agi kamo Niini, oh, igsoon, ug magagawas kamo nga may panilaw na nga iya sa tawong balaan, nga may Espiritu Santo na.

¹⁵⁹ Oh, babaye, ilabay lang ang imong modernong panghunahuna mahitungod sa pagpamisti. Ilabay ang imong modernong panghunahuna, sa dili ka pa mogawas didto sa dalan sa atubangan sa mga lalaki; kamong batan-ong mga babaye, kamong edaran na nga mga babaye, sa dili pa kamo mogawas didto sa dalan nga hugut kaayo ang inyong mga sinina, nga sihay kaayo diha sa likod ug sa atubangan. Dili ako masinawayon. Ako’y inyong igsoon. Nagatindog ako tali sa mga buhi ug sa mga patay, ug nahibalo ako sa kung unsay akong ginasulti. Sa dili pa kamo mogawas, ug hibaloa nga ang inyong lawas usa ka butang nga balaan, o usa ka matang nga balaan nga gihatag sa Dios kaninyo; sa dili pa kamo moadto didto sa dalan, nga nagbisti og sama niana, iagi ang inyong panghunahuna sa Salaan nga iya sa usa ka babayeng nagahunahuna. Ug timan-i kini, nga, “Ang si kinsa man nga nagatan-aw kanimo nga may pagpangibog kanimo, nakapanapaw ka na uban sa maong lalaki.” Timan-i kana, igsoon.

¹⁶⁰ Ug, igsoong lalaki, sa dili mo pa ilingi ang imong ulo aron tan-awon siya, sa nianang ikaduhang pagtan-aw, iagi ang imong panghunahuna sa Salaan nga iya sa usa ka tawong nagahunahuna. Mogawas ka nga may panilaw nga iya sa usa ka tawong balaan, kita n’yo, sa pagbuhat sa kung unsa ang matarung.

¹⁶¹ Himatikdi, kung iagi ninyo ang inyong panghunahuna sa Salaan sa usa ka babayeng nagahunahuna, mogawas kamo nga may pagpamisti nga iya sa usa ka babayeng balaan. Husto kana. Mogawas ka, igsoon, nga may pagtan-aw nga iya sa usa ka lakang balaan. Karon, usa lamang kana ka butang.

Ang tanan-tanan ninyong ginabuhat, iagi kini diha sa Salaan sa Pulong sa Dios, aron makita kung kini ba’y husto o sayup.

¹⁶² Mogawas kamo nga may pagpamisti nga iya sa usa ka babayeng balaan, nga hataas ang buhok, nagapamisti nga

maligdong; usa ka malinawon, mapainubsanon nga espiritu; dili nga mapahitas-on ug malantugion, ug nagapangaway ug kung unsa na lang ang ginabuhat. “Usa ka malinawon, maaghop nga espiritu, nga usa ka dakung bahandi gikan sa Dios.” Mao kana ang gisulti sa Biblia.

Karon gusto kong pangutan-on kamo og usa ka butang, diha sa mga kalungsuran. Magatapos na kita sulod sa pipila na lang ka minuto.

¹⁶³ Karon atong tanan, karong gabhiona, susihon ang atong mga pangandoy, ug dayon makita ninyo kung unsa nga matang nga salaan ang inyong ginaagian. Atong susihon, ang matag usa kanato, dinhi ug diha sa tibuok nasud. Susiha kung unsa gayud ang inyong mga ginapangandoy, kung unsa gayud sa tinuod ang gusto ninyo sa kinabuhi. Susiha kung unsa ang inyong ginapakiglimbasogan. Susiha kung para sa unsa ba nga ania ka. Susiha kung para ba sa unsa nga nagasimba ka. Unsa ba ang nagatukmod kanimo. . . Maayo ang magsimba, apan dili ka lang nga nagaanhi sa simbahan; dili kana makaluwas kanimo. Kita n’yo? Susiha lang sa pipila ka minuto, ingna, “Ang tuyo ko ba’y. . . Unsa—unsa ba nga matang sa salaan ang akong ginaagian, bisan pa?”

Ug kung dili ka mosunod sa Pulong sa Dios, ug dili kini buhaton sa imong kalag, kung ingon-ana aduna gyu’y butang nga sayup; kay ginapakita niini ang imong panilaw, nga ang kinabuhing. . . kung unsa nga matang sa kinabuhi ang anaa diha kanimo. Kung kini balaan, buutan, halangdon, mogawas kini nga ingon niana. Kung dili, aduna ka’y laing panilaw diha kanimo nga imong ginakuhaan. Husto gayud kana.

Ug kung ang maong panilaw para sa Pulong sa Dios ug sa kabubut-on sa Dios, kung ingon-ana nahibalo ka kung unsa ang sa sulod nimo, kung unsa ang nagapahimo sa mao nga panilaw. Nagapakita nga kabahin ka sa nianang Pulong. Kana nga Pulong anaa kanimo, nga nagakuha gikan sa mao nga Pulong.

¹⁶⁴ Unsa’y ginakabig Niini? Nagakabig Kini pinaagi sa Pulong, tungod kay kabahin kamo sa Lawas ni Cristo sa niining kapanahonan. Ug kung kana nga Pulong anaa kaninyo, makahimo lamang kini sa pagkabig pinaagi sa Pulong, ang Espiritu nga ginahimong buhi kana nga Pulong nga anaa kaninyo. Ang Pulong lang nga nag-inusara dili mabuhi. Kana ang hinungdan, “Ang tanan nga gikahatag Kanako sa Amahan magaduol Kanako; ug kung ikaisa na Ako, kabigon Ko ang tanan nganhi Kanako.” Kita n’yo? Kita n’yo, “ang Amahan,” ang bahin sa Lawas ni Cristo nga ania sa kalibutan, nga gipili nang daan, gisulod na diha sa kasingkasing.

¹⁶⁵ Ang si kinsa man nga lalaki nga tinuod gayud nga Cristohanon, nga karon natawo na pag-usab, nasayod, sukad niadtong bata pa siya, o nga usa pa ka batang babaye, hain man,

nga adunay usa ka butang sa sulod ninyo nga giuhaw para sa Dios. Ug gisulayan ninyo ang pagpamiyembro sa mga iglesia ug sa tanang uban pa; dili kadto magpulos. Unsa man kadto? Kadto mao ang Pulong. Nagpangita ka alang sa usa ka Salaan. Ug usa ka adlaw mikidlap Kini sa imong atubangan; nakita mo si Jesus Cristo nga mao sa gihapon kagahapon, karon, ug hangtud sa kahangturan. Mao kadto ang nagpatagbaw sa mao nga panilaw. Kita n'yo?

Tungod kay, ang kinabuhi anaa na sa sulod nimo, nga maoy nagabira. Kita n'yo, ang kinabuhi nga anaa sa sulod nimo ang maoy nagabira. Kini—kini ang nagasulti kanimo kung unsa nga mga pangandoy ang anaa ka dinhi. Ginabira nimo. Dili ka makabira pinaagi *nimi*, ug *niana*, ug *uban pa*. Kinahanglan nga makaplagnan mo kanang husto nga Salaan, tungod kay usa ikaw ka tawong nagahunahuna. Kita n'yo?

¹⁶⁶ Ug kung usa ikaw ka tawong nagahunahuna, ikaw predestinado, og gisala nang daan... sukad sa wala pa ang pagkatukod sa kalibutan.

¹⁶⁷ Ug kung madungog kini sa usa ka ministro sa denominasyon, nagalaum ako nga dawaton niya ang Salaan sa usa ka tawong nagahunahuna, kung siya man usa ka ministro sa denominasyon. Kung ingon-ana iyang isalibay kanang denominasyonhong pakete nga siguradong mahanaw, tungod kay pulong kini sa tawo; ug dawaton ang sinala nga Pulong sa Dios nga dili gayud mapakyas ni mahanaw man, ug magangay Kini sa panilaw nga iya sa tawong balaan. Ug, sama ni Jacob, igasakripisyo niya ang tanan nga iya sa kalibutan ug ang mga kailibgon sa matag denominasyon o kadungganan, nga anaa sa kalibutan, kon diin nga mamahimo kang obispo, cardinal, mamahimo kang presbiteryo pang-estado, o pastor sa usa ka dakung iglesia. Imong igasakripisyo ang tanan-tanan nga aduna niini. Dili pareho kang Esau, aron mamahimong kabahin sa kalibutan; kondili nga sama kang Jacob, ipanghatag mo na ang tanan-tanan nga aduna ka maangkon mo lang ang pagka-panganay, ang Salaan nga iya sa tawong nagahunahuna; tungod kay ihatag Niini kanimo ang panilaw nga iya sa tawong balaan. Ug Kini ang magatagbaw. Ug matagbaw kini, ug matagbaw sa Walay Katapusang panilaw sa balaan nga kaayo sa Dios.

¹⁶⁸ Hinumdumi, nabuslotan ni Satanas kaniadto og usa ka unang buslot ang hunahuna ni Eva, o ang panghunahuna niini, aron mapasulod ang panilaw para sa iyang kaalam ug kahibalo.

¹⁶⁹ Karon hunahuna ninyo kini. Patapos na ako. Mibuslot si Satanas kaniadto og unang bangag, tungod kay ang mahimong hanggabon lamang ni Eva kaniadto mao ang Pulong. Kanang Espiritu nga pinaagi sa Pulong sa Dios, tungod kay miingon si Eva, “Basta nga mohanggab ka lang pinaagi sa niining Salaan,

dili gayud ka mamatay; apan pagmohanggab ka sa niining ania *dinhi*, mamatay ka.” Kita n’yo?

170 Ug miingon si Satanas, “Apan wala ka gayu’y nahibaloan sa anaa *dinhi*. Apan pagmotilaw ka og diyutay sa niining ania *dinhi*, ug dayon mahibaloan mo na; mamahimo kang sama sa Dios. Kita mo, nahibalo Siya sa husto ug sayup; ikaw dili. Ug kung motilaw ka lang og diyutay *niini*.” Ug gitugotan siya ni Eva nga makapagbuslot niini og bangag, usa ra ka gamay nga bangag.

171 Karon nakita ninyo kon ngano nga ginaingon ko . . . Moingon mo, “Nganong dili mo man tudloan ang mga kababayen-an, ug uban pa, kung unsaon pagdawat og mga gasa ug mga butang nga sama niana?”

172 Ingon ko, “Unsaon mo man pagtudlo kanila sa Algebra sa dihang dili man gani sila motuon sa ilang ABC?”

Usa ra ka bangag niini ang gikinahanglan. Gihatud niya ang kalibutanong kaalam, ug, sa dihang nahimo kini, naghatud kini og kamatayon sa maong tibuok pamilya, nga gustong motilaw sa maong kaalam.

173 Karon tan-awa ninyo ang maong salaan, ug siguradong ginapahayag niini ang iyang panilaw. Ang panilaw niya para sa kalibutan; mao kana ang iyang naangkon. Mao kana kung unsa kini sa karon. Nahigugma sila sa kalibutan ug sa mga butang nga iya sa kalibutan, nga may dagway sa pagkadiosnon, apan ginapanghimakak ang Gahum niini. Kita n’yo, pagapasultihon sila ni Satanas sa laing mga dila; pasinggiton niya sila; tugotan niya silang magkaaduna og panerbisyo sa Balaan nga pagpang-ayo; tugotan niya silang magbuhat og tanan na niini nga matang sa mga butang.

174 Moingon Siya, “Daghan ang magaduol Kanako nianang adlaw, ug, ‘Ginoo, dili ba nagpagula man ako og mga yawa, dili ba namuhat man ako og daghang mga butang, gihimo *kini*?’” Magaingon Siya, “Wala gani Ako nakaila kanimo, ikaw nga mamumuhat og dautan.” Sa diha nga ang Pulong gipahimutang na diha mismo sa atubangan mo ug misupsop ka sa gihapon nianang daan na nga salaan nga iya sa kalibutan, kita n’yo, nagapakita kini sa maong panilaw nga anaa sa maong kasingkasing.

175 Dili mahimong mokaon ang mga salampati sa dubok na nga carne. Dili nila kini mahimong kaonon. Wala sila og unsa man nga apdo. Ang uwak makakaon og lugas sama sa usa ka salampati ug makakaon og dubok nga carne sama sa usa ka uwak, kita n’yo, tungod kay usa man siya ka tigpakaaron-ingnon. Apan ang salampati dili hinimo nga sama sa uban pang mga langgam, ug mao kana kon ngano nga girepresentar sa Dios ang Iyang Kaugalingon ingon nga usa ka Salampati nga nagapanaog gikan sa Langit. Kita n’yo? Dili maagwanta niini—dili maagwanta niini

ang baho sa usa ka dubok na nga carne. Dili kini buwitre; ang hinungdan nga, wala kini og unsa man nga apdo. Dili niya kini mahilis. Patyon siya niini, kung kaonon niya kini.

Ug ang salampati dili na kinahanglan nga maligo pa. Nagapagawas og lana ang lawas sa salampati gikan sa sulod, nga maoy nagapapadayon niini nga limpyo. Usa kini ka kinabuhi nga anaa sa salampati; nagapagawas kini gikan sa sulod niini og lana nga padayon nga nagalimpyo sa mga balhibo niini. Ug mao usab sa usa ka Cristohanon; adunay Kinabuhi sa sulod nila nga nagapapadayon kanila nga limpyo. Sinala kini.

¹⁷⁶ Oh, himatikdi! Karon tan-awa siya...ang salaan, ug siguradong makita ninyo ang mga panilaw niini, sa kung unsa ang ilang ginapanghimo sa karon.

¹⁷⁷ Tan-awa kining modernong iglesia. Tan-awa ang ilang salaan. Makita ninyo kung unsa ang ilang ginahigugma. Tan-awa kung unsa ang aduna kanila. Ang gugma, unsa ma'y ilang gihigugma? Si Miss Laodicea nga padulong na ngadto sa paghukom sa Dios. Husto kana. Ang gugma, ang gugma sa iglesia karon maoy para sa Laodicea, usa ka dakung organisasyon, usa ka dakung kahimutangan, usa ka bantugan, inilang butang, mga tawo nga maayo kaayo ang pamisti, hataas ang gieskwelahan, puno sa kaalam, puno sa yawa, ilalum sa kalimbongan sa iglesia kono ni Cristo. Adunay usa ra ka pulong ang angay nga maanaa dinha, "anti-Cristo." Kay, ang tanan nga gipangtudlo ni Cristo, batok sila halos sa tanan-tanan niini; husto, sibo gayud aron nga mahimo nilang tawgon ang ilang mga kaugalingon nga ingon niana.

¹⁷⁸ Karon kung kamo mga tawong nagahunahuna karong gabhiona, dinhi ug didto sa mga lugar kon diin paingon ang maong Mensahe, ang inyong pangandoy mamahimong usa ka Biblikanhong panilaw, dili usa ka denominasyong panilaw, kay kamo pagahukman sa mismong Biblia, sa Pulong nga ginahangyo ko kaninyo nga dinha ninyo ipasala ang inyong kalag. Ug ang pagsalikway sa usa ra ka Pulong Niini, ug nga dili ninyo ipasala ang inyong kalag agi nianang usa ra ka Pulong, igasalikway kamo. "Kay ang tawo dili mabuhi, makaginhawa, pinaagi sa tinapay lamang, apan sa matag Pulong nga nagagula sa baba sa Dios."

¹⁷⁹ Igahatud Kini kanimo, ingon nga predestinado. Ug sa diha nga ginahuypan na kamo sa Ginoo, pagabuhion sa Iyang Espiritu kana nga Pulong ngadto sa pagka-realidad, ug makita ninyo nga si Jesus Cristo mao sa gihapon kagahapon, karon, ug hangtud sa kahangturan. Oh, sus!

¹⁸⁰ Biyai ang denominasyon sa kalibutan, ang relihiyosong pundok. Pasagdi kining nakapahimutang dinha sama niadtong pakete sa sigarilyo didto sa kakahuyan. Pasagdi kining malata ug madunot. Kini—usa kini ka sayup nga salaan. Ug dawata ang

Pulong, nga mao si Cristo, nga maoy nagahatag, ug nagatunol, ug nagapatunhay sa panilaw sa Kinabuhing Walay Katapusan, ngadto sa matag-usa nga magadawat Niini, Kinabuhing Walay Katapusan.

¹⁸¹ Ang Pulong, kung kamo predestinado, makita ninyo Kini. Walay paagi nga maililong Kini kaninyo. Motan-aw kamo dinha ug moingon, “Aba, pagkaklaro Niini kaayo sa akong atubangan! Pagtan-aw ko Niini; anaa Kini. Nagalantaw ako mismo ngadto Niini. Makita ko Kini. Ania Kini, ang Pulong; ang matag Pulong, ang Pulong sa Pulong gayud, nga buhi.” Nan kana ang panilaw sa Kinabuhing Walay Katapusan nga inyong gitinguha.

Ug sa diha nga nagaghawa kamo pinaagi Niana, unsa man ang makalusot Nianang, Salaan nga Iya sa Dios? Walay lain kondili ang Espiritu; wala og unsa man lang, nga kalibutan; wala man lang, og kawalay-pagtoo. Salaan kini nga iya sa Dios. Ug sa diha nga nagaghawa kamo pinaagi Niana, wala og bisan unsa man nga makalusot Niana gawas sa Espiritu Santo.

¹⁸² Karon aduna kamoy ebidensiya sa Espiritu Santo, kita n’yo, panilaw nga iya sa lalaki o babayeng balaan. Gusto nilang mabuhi. Aduna silay Kinabuhing Walay Katapusan. Ug tungod nga gihimong buhi kini nga Pulong diha kanila, buhi sila; Salaan sa usa ka tawong nagahunahuna, ug panilaw sa usa ka tawong balaan.

¹⁸³ Ayaw gamita ang iya sa kalibutan, sama nilang mga kompaniya sa sigarilyo, ilalum sa pagpanglimbong, apan gamita ang Salaan nga iya sa tinuod nga tawong nagahunahuna. Salaa ang hangin nga inyong ginahanggab, ang pagkaon nga inyong ginakaon, ang tanan-tanan kung unsa kamo; hanggaba kini gamit ang Pulong sa Dios, ug magkaaduna kamo og panilaw nga iya sa usa ka tawong balaan. Kay, igapamunga kana Niini, kay Siya mao sa gihapon kagahapon, karon, ug hangtud sa kahangturan.

¹⁸⁴ Ug nasayod ako, kung kita ingon niana man o dili kita ingon niana . . . Nagatoo ako nga ingon niana kita. Apan, kung dili kita ingon niana, adunay mga tawo sa kalibutan sa karon nga kabahin sa Lawas ni Cristo; ug magkinabuhi Kini pinaagi lamang sa Pulong sa Dios, sa matag Pulong nga nagagula sa baba sa Dios para sa niining kapanahonan nga atong gikapuy-an karon.

¹⁸⁵ Ug dili ko makita kon diin ang denominasyon . . . Kadto nga mga Pulong klaro kaayo diha sa Biblia, nga nag-ingon nga mahitabo kini, ug nga mahitabo ang maong mga butang, ug ania kita nagapuyo na karon diha mismo niini. Dili ko makita kon diin nga mopaingon kini sa kung asa pa man gawas niini.

¹⁸⁶ Iglesia, nahibalo ako nga kinahanglan kong magatindog uban kaninyo didto sa Paghukom sa umalabot nga adlaw. Pagkahalayong mahitabo kanako nga sultihan ko kamo og

unsa man nga sayup, tungod lang sa popularidad. Dili ko gusto kana. Kung aduna man ako'y tinguha, akong, kung sa pang-tawhanon lang nga tinguha, kuhaon ko lang ang akong riple ug moadto sa kakahuyan ug magpatindog og payag-payag, ug mangayam, sa tanang nahibilin sa akong kinabuhi. Nagkatigulang na ako, kapoy na, hago na, ug gibudlayan, apan dili ako mahimong moundang. Adunay butang sa sulod nako, nga nagapanglimbasog. Alaut ako kung dili ko isulti ang Kamatuoran ug ang tibuok nga Kamatuoran. Alaut ako kung dili ako motindog dinhi hangtud nga ang kaulahiang ginhawa sa akong lawas mibiya na kanako. Kinahanglan akong mobarug, bisan kung unsa pa'y ingnon ni kinsa man. Aduna ko'y katungdanan sa atubangan sa Dios.

¹⁸⁷ Ug nagatoo gayud ako nga ang mga butang nga atong ginawali mao ang Kamatuoran. Dili tungod nga ako ang nagawali niini. Dili, igsoon ko. Dili, sir. Nasayod ang Dios sa akong kasingkasing. Daw sa unsa ka gusto kong molingkod dinha sa kongregasyon ug maminaw lang sa dinihogang wali. Daw sa unsa kini ka mamahimong sayon para kanako, sigurado gayud tungod aduna man ko og Kinabuhing Walay Katapusan sama sa maong lalaki diha sa pulpito. Kabahin ako Niini pareho kaniya. Moadto ako sa mao gihapong Langit, aduna og mao rang mga pribilehiyo. Daw sa unsa ka mamahimong sayon para kanako nga molingkod lang dinha ug dili makadawat og tanan niining mga bun-og, ug mga bunal, ug kung unsa na lang. Daw sa unsa kini ka mamahimong sayon, nga wala na'y tibuok gabii nga walay tulogan, usa ra ka oras ug tunga, o duha ra ka oras; nakigbugno tibuok gabii tungod sa mga butang nga nahipadayag. Daw sa unsa ka sayon para kanako nga buhaton kana, dalhon ang akong pusil pagkasunod nga buntag, ang akong igpamasol, ug mamingwit o mangayam! Daw sa unsa kini ka mamahimong sayon! Igsoon, mipaingon kanako ang maong katungdanan. Hinaut nga tabangan ako sa Dios nga dili gayud ko molikay sa maong katungdanan, apan ang magpabilin nga matinud-anon ug matinuuron, ug maipakita kaninyo ang Salaan nga iya sa tawong nagahunahuna nga maoy magahatag kaninyo sa panilaw nga iya sa usa ka tawong balaan.

¹⁸⁸ Ang Salaan nga iya sa tawong nagahunahuna mao ang mga tubig, mga tubig sa pagkabinulag. Kini mao ang panghinlo gikan sa sala, nga mao ang Pulong sa Dios. Ug ang tawong nagahunahuna, ang tawo nga nahibalo nga kinahanglan siyang magatindog sa atubangan sa Dios, nga nasayod nga kinahanglan niyang manubag sa tanang Pulong sa Biblia, pagatagbawon Niini kanang panilaw nga anaa sulod sa inyong kasingkasing. Hinaut nga tabangan kita sa Dios nga madawat Kini, sa diha nga ginaduko nato ang atong mga ulo.

¹⁸⁹ Minahal nga Dios, usa na usab o duha ka oras ang milabay. Mituyok na ang orasan. Miadto na ang Mensahe

ngadto sa kasaysayan, ug nalista na Kini diha sa Libro. Karon manubag gayud kaming tanan tungod niini, sa matag lihok nga among gibuhat, sa matag pulong nga among gisulti, sa matag panghunahuna nga miagi sa among hunahuna, nagapadayon sa gihapon ang maong pag-rekord. Ug padayon kini nga mag-rekord hangtud nga matapos na ang kinabuhi, ug dayon manubag kami didto sa Adlaw sa Paghukom.

¹⁹⁰ Oh Dios, ang gamhanang Magbubuhat sa mga langit ug yuta, Nga among ginatoohan, akong ginaampo kini nga mga tawo sa niining panahon. Nagaampo ako para sa akong kaugalingon uban kanila, nga Ginoong Jesus, Imong ipasiugda ang Imong Salaan. Ug kung aduna man ko'y nasulti nga mapasipad-on, Ginoo, akong. . . sa akong kasingkasing wala ako kabalo niini. Nagaampo ako nga kung sayup alang kanako nga dalhon ang Imong Pulong ug gamiton sa ingon nianang butang nga sama niana, pasayloon Mo ako tungod niini.

¹⁹¹ Apan, Ginoo, gihunahuna ko nga sa dihang nagsulti Ka kanako didto sa mga kakahoyan, kabalo Ikaw sa maong oras niadtong buntaga, dili ko lang gayud kini matangtang sa akong hunahuna. Gidawat ko kadto ingon nga nagagikan Kanimo. Busa, Amahang Dios, ako nang giwali kini. Ug nagaampo ako, Dios, nga tugotan mong mamaingon niana kini nga sa hunahuna ko mamaingon niana kini, nga ang tawong nagahunahuna, ang maong tawo kung aduna siya og unsa man lang nga panghunahuna, mahibaloan niya nga kinahanglan siyang motindog sa Presensiya sa Dios, ug dili siya modawat ngadto sa iyang kalag og unsa man nga magahugaw niini o nga supak ngadto sa Pulong sa Dios.

¹⁹² Ug, Amahan, naamgo namo kana, sa diha nga gikumpara ko kini sa niining mga organisasyon sa karon; dili aron nga mamahimong lahi, Ginoo. Pagahukman Mo ako, sa umalabot nga adlaw, sumala sa akong kasingkasing, Ug nagaampo ako, Dios, nga makita Mo nga dili kini aron nga mamahimong lahi, apan kini aron nga mamahimong matinuuron, sa pagpaninguha nga mamahimong sinsero, nahibalo nga ginahawiran ko ang mga gipalit Mo na sa Imong Dugo, gikan sa baybayon ngadto sa mga baybayon, mismo karon, diha sa akong kamot. Ug daghan kanila ang mitoo sa maong Balita.

¹⁹³ Ug, Dios sa Langit, hinaut nga wala ni usa kanila ang malaglag. Ako silang ginaangkon, ang matag usa kanila, ug ginatuboy sa atubangan nila ang Salaan para sa sala, ang mga Tubig sa pagkabinulag, ang Dugo ni Jesus Cristo, ang Pulong nga nahimong unod. Itugot kini, Ginoo. Ug hinaut nga ibubo sa Balaang Espiritu ang matag saad, ngadto sa among mga kalag. Ug hinaut nga mamahimo kaming buhi nga mga representante nga Pangasaw-onon ni Jesus Cristo, sa panahon sa mga mata, sa maong igtatan-aw diha sa Kahayag sa kagabhion, kay amo kining ginapresentar Kanimo sa Ngalan ni Jesus Cristo. Amen.

¹⁹⁴ Nahigugma ba kamo Kaniya? [Nagaingon ang kongregasyon, “Amen.”—Ed.] Ginatoohan ba ninyo Kini? [“Amen.”] Ako, kung may nasulti man ako nga sayup, sa pag-ingon, “salaan sa tawong nagahunahuna,” Wala ko’y mahimong isulti pa. Wala ako’y edukasyon. Kinahanglan ko lang isulti kung unsa’y nagaabot kanako. Ug sa dihang nakita ko nga atua kana didto, nahunahunaan ko, “Daw sa unsa nga laray sa hipokrisiya!”

Ug may sa kung Unsa nga miingon, “Sama gayud sa iglesia.”

¹⁹⁵ Salaan sa usa ka tawong nagahunahuna! Oh, sus! Aduna kini og dugang pa kay niana. Ang usa ka tawong nagahunahuna dili man lang mogamit niini. Kita n’yo? Dili gayud. Ug ginapangandoy niini ang panilaw nga iya sa usa ka tawong nagapanigarilyo, husto kana, tungod kay kinahanglan magkaaduna siya niini aron nga matagbaw ang iyang panilaw. Apan ang usa ka tinuod, ang tawong nagahunahuna nga nasayod nga paingon ang iyang kalag ngadto sa Paghukom, ginasala ang iyang panilaw pinaagi sa Pulong sa Dios. “Kay ang tanan nga gikahatag Kanako sa Amahan magaduol Kanako.” Ug magkinabuhi siya pinaagi sa matag Pulong nga nagagula sa baba sa Dios, nga mao ang mga Tubig sa pagkabinulag nga nagahimulag kanato gikan sa sala. Kay, kung paghisgotan ang Pulong, makita nato nga sala kini ang dili-pagtoo Niini, busa ginatoohan gayud nato Kini ug nagapadayon. Usa kini ka paghimulag gikan sa sala. Nahigugma ba kamo Kaniya? [Nagaingon ang kongregasyon, “Amen.”—Ed.]

I love Him, I love . . .

Atong itaas ang atong mga kamot karon ngadto Kaniya.

Because He first loved me
And purchased my salvation
On Calvary’s tree.

¹⁹⁶ Unsay Iyang giingon? “Tungod niini ang tanan makaila nga kamo Akong mga tinun-an, kung kamo maghigugmaay, adunay gugma para sa usa’g usa.” Karon maglamanohay kita samtang atong kantahon kini pag-usab, ug ingnon, “Gihigugma ko, usab, ikaw igsoon.”

I love Him, I . . . (Sa pagpahibalo kini kaninyo
nga . . .)
. . . He first loved me
Ang purchased my salvation
On Calvary’s tree.

¹⁹⁷ Karon, nagustohan ba ninyo ang Salaan sa tawong nagahunahuna? [Nagaingon ang kongregasyon, “Amen.”—Ed.] Sa diha nga moadto na kamo didto sa dalan sa pagpakigbagnus og mga bukton sa kalibutan ugma, igsoong lalaki, igsoong babaye, aduna ka na ba’y Salaan nga iya sa tawong nagahunahuna? Pagtawgon ka nianang tawo og usa ka holy-roller, gamiton mo ba ang Salaan sa usa ka tawong

nagahunahuna? Sa diha nga ang usa ka tawo mosulti og unsa man nga dautan batok kanimo, aduna ka ba'y Salaan nga iya sa tawong nagahunahuna? Kita n'yo, magbuhat og maayo sa tawong dili-maayo. Iampo kadtong nagabuhat kaninyo og dautan, ug kadtong nagalutos kaninyo, kung ingon-ana nagaginhawa kamo pinaagi sa Salaan nga iya sa tawong nagahunahuna.

¹⁹⁸ Kay kung nagahigugma kamo sa kadtong nagahigugma lang kaninyo, sama nga nagalamanohay kita, ingon nga mga minahal diha sa Ginoo, maayo man kana, apan mahimo ba ninyong higugmaon ang dili-hiligugmaon? Kana ang Salaan sa tawong nagahunahuna. Kana ang Espiritu ni Cristo nga anaa sulod kaninyo, nga ginahigugma kadtong wala nahigugma kaninyo, kung ingon-ana aduna kamo'y ganti sa Dios. Apan, karon, kung ginabuhat ninyo kini ingon nga usa ka katungdanan, wala kaninyo sa gihapon ang tawong nagahunahuna. . . Hangtud ka lang diha sa ikaduha nga lingin. Apan kung nagagikan kini sa imong kasingkasing nga ginahigugma mo siya, kung ingon-ana nagaginhawa ka sa Salaan nga iya sa tawong nagahunahuna. Ug ginatagbaw Niini ang panilaw nga iya sa tawong balaan, nga nasayod ka, gikan sa imong kasingkasing nga ginapasaylo mo ang tanang tawo, ang tanan-tanan, bisan kung unsa pa ang nahitabo. Dili ba pagkamaanindot Niya?

. . . first loved me
And purchased my salvation
On Calvary's tree.

We'll walk in the Light, It's a beautiful Light,
It comes where the dewdrops of mercy are
bright;
Shine all around us by day and by night,
Jesus, the Light of the world.

We'll walk in this Light, It's such a beautiful
Light;
And It comes where filtered drops of mercy are
bright;
Oh, shine all around us by day and by night,
Jesus, the Light of the world.

Come, all ye saints of Light, proclaim,
Jesus, the Light of the world;
The the bells of Heaven will ring,
Jesus, the Light of the world.

Oh, we'll walk in the Light, It's such a beautiful
Light;
It comes where the dewdrops of mercy are
bright;
Oh, shine all around us by day and by night,
Jesus, the Light of the world.

Gusto ba ninyo kana? [Nagaingon ang kongregasyon, "Amen."—Ed.]

Oh, we'll walk in this Light, it's such a
beautiful Light;
And It comes where the dewdrops of mercy are
bright;
Shine all around us by day and by night,
It's Jesus, the Light of the world.

Gusto ko gayud kana!

My faith looks up to Thee,
Thou Lamb of Calvary,
O Saviour Divine;
Now hear me while I pray,
Take all my sin . . . (Salaa ako, Ginoo, pinaagi
sa Pulong.)
O let me from this day
Be wholly Thine!

Hunahunaa lang ninyo kini, gisala na pinaagi sa Pulong,
"Imoha na gayud."

While life's dark maze I tread,
And grief around me spread,
Be Thou my Guide;
Bid darkness turn to day,
Wipe sorrow's fears away,
Nor let me ever stray
From Thee aside.

[Ginasugdan paglaylay ni Igsoong Branham ang *My Faith Looks Up To Thee*—Ed.]

. . . to my fainting heart,
My zeal inspire;
O bid darkness turn to day,
And wipe sorrow's tears away,
O let me from this day
Be wholly Thine!

¹⁹⁹ Minahal nga Dios, gusto gayud namo ang magkanta alang Kanimo, kay dinha namo maipahayag ang among mga gibati, ang among emosyon, ang tibuok kongregasyon, samtang nga Imong ginahuyop nganhi kanamo ang Imong Pulong sa Kinabuhi. Mapasalamaton kami kaayo, Ginoo. Ug sa nianang kanta, dawata kami, mahimo ba Nimo, Ginoo? Mao kana ang among tinguha, ang masala pinaagi sa Pulong sa Dios, ang maglakaw matag adlaw diha sa Kahayag, ang Kahayag sa Maayong Balita.

Ug pun-a sa gugma ang among dalanon sa
matag adlaw,
Samtang nga nagalakaw kami uban sa
Langitnong Salampati;
Tugoti kaming nagaadto, nga may kalantahon
ug may pahiyum,
Pun-a sa gugma ang among dalanon sa matag
adlaw.

²⁰⁰ Itugot kini, Ginoo. Panalangini kaming tanan karon. Tugoti nga ang Imong grasya ug kaluoy magauban kanamo. Ayoha ang mga may sakit ug ang mga nag-antus sa tibuok nasud.

²⁰¹ Ginapasalamatan Ka namo para kang Igsoong Coggins karong gabhiona, nga Imo siyang gitugotan nga makahawa na sa hospital, aron makapauli nga naulian na. Salamat sa tanang mga butang nga Imong gihimo, ug para sa amo mismong kusog nga nabati namong naalsa karon.

²⁰² Ginapasalamatan Ka namo sa medyong putol-putol nga Mensahe karong gabhiona, Ginoo. Akong—wala ko nahimo kini sa husto, apan nagaampo ako, Ginoo, nga himoon Mo kini nga husto diha sa panan-aw sa mga tawo, nga makita nila ug mahibaloan kung para sa unsa kini gituyo. Angkona ang himaya gikan niini, Ginoo, ug hinaut nga maangkon namo kining pagsabot, nga wala na gyu'y uban pa, nga kinahanglan magkinabuhi kami pinaagi sa Tinapay nga iya sa Pulong sa Dios, nga sinala gikan sa Dios nga para lamang sa Iyang mga anak. Usa kini ka gihimulag na nga kongregasyon. Dili Kini para sa kang kinsa pa man. Kini para lamang sa kadtong, Imong mga pinili, sama nga ang mga tubig sa pagkabinulag sa mapula nga nating vaca maoy para sa kongregasyon sa Israel lamang. Busa, Amahan, nasayod kami nga ang maong Tinapay para sa mga Carnero lamang.

“Dili matarung nga kuhaon Ko ang tinapay nga para sa mga anak ug iitsa ngadto sa mga iro,” ang ingon ni Jesus.

Ug ang babaye, sa pagtubag, miingon, “Oo, Ginoo, matuod kana, apan andam akong mokaon sa mga nagakahulog nga mumho.”

Ug ingon niana ang among gibati karong gabhiona, Ginoo. Gusto namo ang tanan nga mahimo Mong ihatag kanamo, Amahan, tungod kay kami gutom ug uhaw para sa dugang pa Kanimo.

²⁰³ Itugot nga mapuno ang among kagutom ug mapahayag ang among mga tinguha, kay, Amahan, gusto namo ang mga tinguha nga iya sa usa ka tawong matarung. Ug ang matarung nga Tawo mao si Jesus Cristo, ug ang Iyang tinguha mao ang pagbuhat sa kabubut-on sa Amahan, nga mao ang Pulong. Itugot kini kanamo, Amahan. Amo kining ginapangamuyo sa Iyang Ngalan. Amen.

Manindog kita karon samtang nga ginakanta nato ang papauli na nga kanta, nga, *Take The Name Of Jesus With You*.

²⁰⁴ Dinha sa mga lugar karon, kon diin nakaabot ang Mensahe karong gabhiona, hinaut nga magauban ang Dios kaninyo karon samtang magpapauli na kita diha sa pag-ampo. Hinaut nga ang matag usa kaninyo, dinha, nagalaum ako nga ingon kamo nga nalipay sama sa kalipay ko sa pagdala Niini kaninyo. Ug nagasalig ako nga ibutang Kini sa Dios diha sa inyong mga kasingkasing ug ihatag kaninyo ang hustong interpretasyon niini.

²⁰⁵ Ug kamong mga tawo dinhi nga anaa diha sa mga nanambong nga kanila ang mga panyo nga napahimutang dinhi, gipandongan ko na ang mga niini. Nagaampo ako nga pagaayohon sa Dios ang matag usa kaninyo, nga walay kinsa man nga tawong masakiton sa taliwala kanato, nga makita ninyo kung unsa nga ang Dios nagatubag og pag-ampo.

²⁰⁶ Sa diha nga nagakatigum kitang tanan, “Ang katawhan nga gihinganlan sa Akong Ngalan magkauban nga igatigum ang ilang mga kaugalingon ug mag-ampo, nan Ako magapatalinghug gikan sa Langit.” Gisaad Niyang buhaton kini.

²⁰⁷ Busa, dili kita nagkabahinbahin. Usa ra kita ka Persona; usa ra kitang tanan, diha kang Cristo Jesus. Ug ang matag usa nagaampo para sa matag usa; iampo ninyo ako samtang nga nagaampo ako alang kaninyo. Ug panalanginan kamo sa Dios hangtud nga magkitaay na usab kita.

²⁰⁸ Ug nagasalig ako nga kanunay kamong...kamo nga nagpuyo duol dinhi, anhi mo sa tabernakulo ug duawa dinhi ang atong maayong pastor, si Igsoong Neville. May mahimo siyang maayo kaninyo, si Igsoong Mann ug ang buutang mga tawo nga ania sila dinhi sa tabernakulo.

²⁰⁹ Kung haduol kamo kang Igsoong Junior Jackson o sa uban pa kanila sa tibuok nasud, sa New York ug sa nagkalainlaing mga lugar kon diin aduna sila’y mga tigum, palibot sa Arizona ug California, duawa ninyo kini nga mga kasimbahanan kung mahiadto man kamo didto. Nagaampo kami nga makabalik na usab kamo ug tugoti nga matabangan kamo sa pastor nga makaila pa og dugang mahitungod kang Ginoong Jesus.

²¹⁰ Panalanginan kamo sa Dios samtang nga ginakanta nato ang *Take The Name Of Jesus With You*.

. . . the Name of Jesus with you,
Child of sorrow and of woe;
It will joy and comfort give you,

[Nagapakigsulti si Igsoong Branham sa usa ka tawo ibabaw sa entablado—Ed.]

. . . you go.

Precious Name (precious Name), O how sweet!
 (O how sweet!)
 Hope of earth and joy of Heaven;
 Precious Name, O how sweet!
 Hope of earth and joy of Heaven.

²¹¹ Sa pagtan-aw ko sa kongregasyon karong gabhiona, nakita ko si Igsoong Estle Beeler dinha sa likod, si Igsoong Palmer, ug daghan pa, si Igsoong J.T., ug daghan pa kaayong mga ministro nga nagtindog sa palibot dinhi, dili ko na sila mahinganlan tanan. Gusto ko unta nga mapaanhi ko, ang matag usa kaninyo, dinhi sa itaas, ug inyo tanan mapapauli na ang kongregasyon o mapabuhat og unsa man. Inyo man nasabtan, dili ba? Nasayod ako nga aduna kamo og Cristohanong kasingkasing ug nasayod nga kinahanglan natong . . .kung unsa kita—kung unsa gayud kita; kitang tanan usa ra ka Persona, diha kang Cristo Jesus.

²¹² Karon atong hinumduman kining sunod nga garay sa diha nga atong kantahon kini, samtang ipapauli na kita ni Igsoong Martin diha sa pag-ampo. Ug gusto kong . . .Kini si Igsoong Earl Martin nga gikan pa sa, pagtoo ko, gikan pa sa Arkansas o—o sa Missouri. [Nagaingon si Igsoong Earl Martin, “Missouri.”—Ed.] Missouri, ibabaw mismo sa Arkansas, sa dalan didto sa Missouri. Aduna sila’y simbahan didto.

²¹³ Ug nahimatikdan ko kining usa pa ka igsoong lalaki nga gikan usab didto, dili ko na madumduman ang iyang ngalan, Brewer. Ania siya kaganinang buntag. Siguro ania siya sa gihapon karong gabhiona. Oo, nakita ko siya nga nagatindog dinha dapit, si Igsoong Brewer. Misaad ako nga mohapit didto ug ihalad ang ilang mga kasimbahanan, sa daghan na kaayong mga higayon. Moabot ang adlaw nga makaadto gayud ako didto, sa tabang sa Ginoo, sa mahimo ko.

Karon, samtang nga atong kantahon kining sunod nga garay karon.

At the Name of Jesus bowing,
 Falling prostrate at His feet,
 King of kings in Heaven we’ll crown Him,
 When our journey is complete.

Atong kantahon kini karon.

At the Name of Jesus bowing,
 Falling prostrate at His feet,
 King of kings in Heaven we’ll crown Him,
 When our journey is complete.

Precious Name (precious Name), O how sweet!
 (O how sweet!)
 Hope of earth and joy of Heaven;
 Precious Name, O how sweet!
 Hope of earth and joy of Heaven.

Oh, take the Name of Jesus with you,
As a shield from every snare; (paminawa karon)
Oh, when temptations round you gather, (unsa
ma'y kinahanglan n'yong buhaton?)
Just breathe that holy Name in prayer.

Precious Name, O how sweet!
Hope of earth and joy of Heaven;
Precious Name, O how sweet!
Hope of earth and joy of Heaven.

Atong iduko ang atong mga ulo.

O precious Name, O how sweet!
Hope of earth and joy of Heaven;
Precious Name (nabautismohan na diha Niini;
nagaampo Niini), O how sweet!
Hope of earth and joy of Heaven.

Igsoong Martin. [Nagaampo si Igsoong Martin—Ed.]



SALAN SA USA KA TAWONG NAGAHUNAHUNA CEB65-0822E
(A Thinking Man's Filter)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Agosto 22, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org